

गो भेडा गोठमी जरमेशो बाक्ती

आं बाजे आ खिं सुन्दरे माइक्तीक लेखम बाक्त। मिनु बेंसी वांच्पुमी यो इम्चीली खिं का, चोक्टा का खेत नु सुरका निक्शी चिरस रू यो बाक्त। बाजे के ठेयब भेडा गोठ का यो बाक्त। बाजे बेकम नोले बगेम आं आफ कली सुन्दरे डा खिं गेशा आं चहि बेंसी वांच्पुमी यिशा बाक्शो बाक्त।

आं आफ नेल्ल आन क्येडा जोक्ब ठेयब पोंइब बाक्त। मोपतीके डोन डोन डा मुरपुकीमी यो आं आफ कली ब्रेशशा लाइक्बाक्तेकम। मोदे डोन डोन लचा माल्दानु आं आफ शुश नाक्त नोले ला खिंमी लेशशा जाक्बाक्त। मोदुम्तीके बाजेमी फुपु ठुली कली मेको भेडा गोठ जिम्मा गेशो बाक्त। फुपुम भेडा गोठ कइलेना डोन डोन यो लाइक्चा माल्बाक्त। मिनु हिरना हिरन कइलेना गाउं आ नेक्था यो चाक्बाक्त। आं ममामी फुपु कली बुत लाम्जी तिक्बाक्त। आं आफ खिंम बाक्मेनु फुपु कली बुत लाम्जी चोचीना आं यो ममा नु काथा गोठीम लाइबाक्त। मोपा लसानु गोठीम का निक्शी नाक्त बाक्बाक्सा बाक्त।

वाचपु डा नेल्ल क्येडा सिरम चुली माइक्तीक ब्वाकी बाक्ब। वाचपु डा ब्वाकी आन दातेमी मेको चुली डा ब्वाकी नेल्ल क्येडा ठेयब बाक्ब। मेको ब्वाकी आ दातेमी दोम्ली का बाक्ब। मेको दोम्ली डा ब्वाक्कु दक्खिन गे डा रोंगु रे पा तोइशशा वाचपु गे बुप्शो बाक्ब। मेको खोला लुक्च गे बुप्ना बुन लमेनु, अरु अरु आइक्च आइक्च खोलापुकी यो ब्वांइसीना सिन लशा, थम दारशो ठेयब पोकली छांगा दुम्शा वाचपुम तोंइसीशो बाक्ब। मेको दोम्ली आ नेक्थाम दिंम का यो बाक्ब।



पोकली छांगा

१९८३ सालअसार डा लोव्र बाक्ब, आं फुपुम मेको दिंममी भेडा गोठ चाक्गा बाक्त। मिनु आं ममा नु आं आफ मेकेर बुत लाम्जी चोव्रथ लसा बाक्त। गोठ जाक्दीशशो आ दिसा नाक्त ३१ गते बुधवार बाक्त। मिनु गो मेको नाक्तम मेकेर जरमेशो बाक्ती। मिनु आं ममा नु आफ आं जरमेशो आ दीसा सुनी कना खिं लेस्सा बाक्त। फुपुम खिर क्येशा लाम्जी कुरपदा बाक्त। मिनु खिं यिसानु, ते ते नांइससा, मेक मेक खिर जना जना बल्ल बल्ल पा नाक्दो खिं जाक्सा बाक्त।

गो बर्स निक्शी नु छ महिना डा दुम्डानु, आं आफोमी अर्को मीश का चाक्का बाक्त। मे नोले आं आफोमी लेंशा अर्को मीश का नु यो चाक्तु। मोपा आं आफ के चार जना मीश दुम्मा बाक्त। आं ममा चहिं आं आफ आ माइली मीश बाक्त। जेठी मीश डोंइती कना बेक्शो बाक्त। इच्का महिना नोले आं ममामी बहिनी का थिप्तु। तन्न मेको बहिनी इच्का नाक्त नोले बेक्त। मिनु बहिनी बेक्शो इच्का नाक्त नोले आं ममा यो बेक्त। मोपतीके आं कली बगेम बेंसी वांच्पुमी यिइश्शा, थुल्शा कोल्पाइक्ती।

लाहुर प्रोक्शो लोव्र

गो पन्द्र, सोर बर्स डा बाक्डानु, काबु नाक्दो आं वारच आ खिंमीन बाक्शा, खिं मलड। आ दीसा सुनी खिंमी लडानु, बगेमी “सिनाक्त रे ते लवे मेकेरन लावो। मेकेरन जावो। गो इ कली जचा यो मगेनन बाक्चा यो मगेनन” दे हुइक्ताक्यी। मिनु गो फिर लेशशा, डांडा बारी गे लती। मेकेर आं आफोमी ब्याफ वाक्ना वाक्न बाक्त। मिनु गोमी आं आफ कली “आं कली वाक्चा गेयीनी” देंडानु “ममाल्ब गो आंमान वाक्नुड” देंशा वाक्चा मगेयी। मिनु गो पिपल डांडा गे ब्रुप्शा, मेकेर पुट निश्शा “मुल मार पड?” दे मिम्ना मिम्न बाक्डानु “मुल लाहुर लचा दुम्ती” दे ती फ्रुक्चा पित। आं गोजी सुल्शा कोव्रडुनु सुका का क्येट बाक्त। मिनु छुल बोक्शा शुरुप वारच का आ बाक्तीक अमारे माइक्तीक खेत गे लुक्चै लुक्च ब्रुप्ती। मेकेर जाक्दीश्शा मेको कली “क्येट कुरी” दे हिल्लो पडानु, मेकोमी “अंह मकुरु” देंत। मिनु गोमी मेको कली “गो मुल लाहुर प्रोक्ती। मुलाक्त नु दीसा सम्म सुइ कली मारेइ मशेंदो। नित्थ सांबु नाक्त बगे कली लाहुर लत, दे शेंदो। मारदे हना बगेमी सुर्ता पाइब” दे माइक्ता।

मेना जापान नु जरमन आस दातेमी लडाइ पा शुश लाहुरे बेक्शो बाक्तेम। मोपतीके लाहुर लाइब गल्ला वाला आन कली गाउं डा मुरपुकीमी आन गाउंमी जाक्चा मगेबाक्तेक्म। मोपतीके

मेकोपुकी बजार पित्थ ख्रुइश्शा बाक्शा लाहुर लचा दाक्ब मुर आन कली लाहुर लाइक्बाक्तेक्म।

गल्ला वाला सांघुटार बजारमी बाक्नीम, देंशो नेंशो बाक्ती। मेको बजार आं खिं रे कोस सां डोन बाक्ब। मिनु गो आं वारच कली मोशो लोव्र देंशा, वोइश्शा फेलेल पा दोरशा सांघुटार बजार जाक्दीत्ती। मेकेर जाक्दीश्शा ६ पैसा डा माना का तांपरा ग्याप्शा पोल्टोमी कुरपा जना जन बाक्डानु, बुज डा गल्ला वाला कामी तती। मिनु मेकोमी आं कली “मुख्य इन खिं तेक मे?” दे हिल्लो पती। मिनु गोमी “वाचपु” दे माइक्ता। मिनु मेकोमी “लाहुर गाक्नी?” देंमेनु, गोमी “ओं” माइक्ता। पांच छ जना आं क्येडा डोंइती मेकेर जाक्दीश्शा, बाक्शो बाक्तेक्म। गल्ला वाला निक्शी बाक्ताक्स। मिनु कामी मेकेर जाक्ब आन कली “लो, गाक्च” देंशा आंइ कली लाइश्शा गाक्त। मारदे हना आंइ मुरपुकी जाक्शा, आंइ कली “मलचा” दे लेप्पाइक्नीम दे हिंशा नाक्दोन आंइ कली मेकेर रे गाक्पाइक्तु।

मिनु गोपुकी मेको नाक्दो नवलपुर जाक्दीश्शा बाक्शो। मेकेर रे पा गोदार माइक्तीकेमी जाक्दीश्शा, नाक्त सां सम्म नोले यीब मुर आन कली रिम्ना रिम्न बाक्तक। मिनु गोपुकी गोदार जाक्दीश्शो चार नाक्ती जाक्दीम्मेनु, अर्को गल्ला वाला यो अरु मुर आन कली कुरशा जाक्त। मिनु गोपुकी नेल्ल खाल का खोइ दुम्शा, जयनगर माइक्तीकेम जाक्शा, रेल डोइश्शा लहरी सराइम जाक्दीत्तक। मेकेर जाक्दीश्शो इच्का नाक्त नोले लाहुरे दुम्चा कली नें ब्रेक्पाइक्तीक नाक्त जाक्त।

मिनु आंइ कली लाइब गल्ला वाला का जाक्शा आं कली “इ कली हिल्लो पाइब कली अठार बर्स जाक्दीत्ती देनो। मिनु नाक्तीकेमी डोंइसेनु, बोल पा थेक्शा डोंइसो” दे सोइक्ताक्यी।

मारदे हना गो पन्ध्र बर्स ला जाकदीशशो बाक्ती। मिनु नाक्तीके यो मगापच डा आइक्च बाक्ती। गो मेको आ देंस पा पाता। मिनु भरती यो दुम्ती।

२०००/८/२८ डा नाक्तीम अर्को गल्ला वाला यो अरु मुरपुकी कुरशा जाक्तेक्म। मिनु गो नेल्ल पा सहे सां भरती दुम्शा, महिना का खोइ मेकेर बाक्तक। नोले अरु गल्ला वालापुकी यो शुश मुर कुरशा जाक्तेक्म। मिनु गो शुश दुम्तक। मिनु होसियारपुर माइक्तीकेमी लशा ११ महिना सम्म तारा आप्तीक तालीम पाइताक। मेको तालीम थुम्शो नोले ६१ नाक्त डा खिं लतीक छुट्टी ताइतक।

बरमा डा लडाइमी लशो

छुट्टी नुम्मे नोले गो लेशशा सेकेन्ड रिइनफोरसमी हाजीर दुम्ती। हाजीर दुम्शो नोले दारजलीङ डा कामसीङ नु गो आंस कली भ्नासी सिगनल शेंथ सोइक्तास्की। अरु चहिं बरमा डा लडाइमी लाम्तेक्म। गो निक्शी ६ महिना डा तालीम थुम्शा लेत्तस्कु। मिनु मेकेर रे पा आं कली फास बरमा राइफल माइकटीला माइशो ठाउं डा बरमा डा लडाइमी सोइक्ताक्यी। मेकेर आंइ जाकदीशशो इच्का नाक्तीम जापानीपुकीमी आन गुइ पोक्तेक्म। मिनु २००४ सालमी बरमा आम आन केन राज्य दुम्त।

लडाइ थुम्शो नोले बरमा डा ठेयब मुरुम आंइ कली “दीसा नित्थ इन्डीया गोपुकी नु गाइक्ताक्व हना, इन कली खिं सोइक्ने मचाप्नीकी। मोपतीके गेपुकी मुल



इन खिं लेत्तीनी हना, रिम्शो दुम्ब” देंतेक्म। मोपतीके गो नें खोइशशा खिं कुती। मिनु खिं जाक्शा २००५/३/१७ गते नाक्तीमी ग्युंवे पाता।

ब्रिटीस आरमीमी भरती दुम्शो

खिंमी बाक्शो छ सात महिना खोइ दुम्मेनु, खिंमी बाक्चा मदाक्तु। मिनु खिं डा मुर आन कली “मुल गो लहरी सराइमी आं के इच्काका क्येट जाक्चा माल्शो बाक्ब। मोपतीके मेको ब्रथ लाइनुड” दे सहे बर्स गाप्शो आं बगे नु आं मीश कली जोल पा लशा, ब्रिटीस अरमीमी भरती दुम्ती। भरती दुम्चा कली गो गोरखपुर जाक्दीत्ती। मेना कुना घाट देंतीकेमी भरती पतीक डिपो बाक्त।

मेकेर जाकदीशशा एर ओंथ हिल्लो हिकसी पडानु, बरमा आरमी डा मुर आन कली लेंशा भरती मब्राइनीम ने देशो लोव्र नेंता। मिनु मुल मार पड दे मिम्ताकड। आं कुरशो क्येट यो नुप्त। मुल जयनगरमी लेशशा, लशा रेगरुटमी भरती दुम्चा माल्ती दे मिम्शा लेत्ती। मेना खरच नेल्ल नुप्शा, खमे मजशो नाक्त सां दुम्शो बाक्ती। जयनगरमी बल्ल बल्ल बुज खस गाउं डा जमदार कली ग्रुम्ता। मिनु मेको कली “गोरखपुरमी भरती दुम्चा कली लडानु, डोंइती भरती दुम्शो आन कली लेंशा भरती मताक्नीक दे आं कली भरती मताक्गेम। साहेब, मुल रेगरुटमी भरती दुम्चा गारनुडा कौं?” दे हिल्लो पाता। मिनु मेकोमी “दुम्ब” देंत। आ दीसा सुनी इन्डिया आरमीमी भरती दुम्ने मचाप्शो दस जना, गाउं रे नक जाक्शो ६ जना नु गो नेल्ल पा १७ जना दुम्शा लेंशा गोरखपुर लेत्तक।

गोरखपुर रेल स्टेशन जाकदीशशा, तोंइसकानु रेल के टिकट दा सात जना कली ला खोइशशो बाक्त। अरु दस जना के टिकट मबाक्शो बाक्त। मिनु गल्ला वालामी आं कली “गुरुजी एको दस जना आन कली रेल गाक्तीक लां रे गाक्पाइशशा कुनाघाट चाक्दीम्मी” दे सोइक्तायी। मिनु गोपुकी गाक्शा, मेकेर जाकदीशशा ग्रुम्तक।

मिनु गोपुकी चिक्साक्क। रगीन डा वारच का के दौरा निक्शी बाक्त का पुंइशा फेक्शा रेगरुटमी भरती दुम्चा कली लाइनमी राप्ती। आंइ कली भरती पाइबपुकीमी लेंशा जाक्बपुकी सुइ बाक्मा कौं दे थाम्पान हिल्लो हिकसी पाम्तेक्मे। तन्न गो मारेइ मतुइशशो खोदेशो पा बाक्ती। सां आन कली लेंशा भरती दुम्थ जाक्शो बाक्तेक्म दे तुइशशा ग्रुंइताक्म।

आं कली यो भरती दुम्ने थुम्शो नाक्त निक्शी नोले तुइक्ताक्म। मिनु आं कली “तेको पलटन डा नवे?” दे हिल्लो पती। गोमी “लेंशा भरती दुम्थ जाक्ब मनड” दे मइक्ता। तन्न मेकोमी “महिनो इ कली गो ग्रुंइशा मसोइक्नीकी” दे माइक्ती। मिनु गोमी “फस बरमा राइफल डा नड साहेब” दे माइक्ता। मेको नोले आंइ कली मलाया डा सेरेमबनमी नौ महिना डा तालीम गेम्तेक्मे। मेना मेकेर १/७ नु २/७ निम्फा बटालाइन के तालीम काथा दुम्त।

तालीम थुम्शो नोले गो २/७ बटालाइन डा दुम्ती। मेकेर रे पा आं कली सिगनल पलटनमी सोइक्तायीमी। मिनु आ दीसा सुनी पलटन १६ नम्बर, ६२ नम्बर नु ६८ नम्बर वारलेस सेट गाडीमी कुरपा कोलल्मपुर रे नां दाप्तीक गे थम डोन लाइक्तीकी। मेकेर हप्ता का बाक्शा मेन्ताक्व माइक्तीकेमी लाइतक।

मिनु वेनडिट नु लडाइ पतीकेमी लशा ६ महिना सम्म कन्ट्रोलर अपरेटर के गेय पाता। मे नोले आं कली १/६ जि. आर. नु गरशा, गेय पचा कली ए कम्पनीमी सोइक्ताक्यीमी। मेकेर यो अपरेटर दुम्शा, महिना सां सम्म ब्वाकीमी गेय पाता। मेकेर यो नेल्ल रिम्शो दुम्त।


मिनु नोले आं कली ए. बी. सी. डी. नु सपोर्ट कम्पनीमी पालो पालो पा नेल्ल कम्पनीमी सोइक्ताक्यीमी। मोपा ते ते लडा, मेक मेक गोम रिम्शो पशो तशा, आं कली बेलायतमी तालीम पथ सोइक्ताक्यीमी।

बेलायतमी शेंसीथ लशो

२००६ सालमी गो आं पल्टन कोलालम्पुरमी बाक्त। मेना गो बेलायतमी सिग्नल कोरस पथ लचा ताता। कोलालम्पुर रे रेल डोइशशा, सिडगापुर जाकदीत्ती। मेकेर रे चेसेर नें पाइशशो पानी जहाज डोइशशा ४ नाक्ती ४ नाक्दोमी बरमा डा याडगुन माइशशो सहरम जाक्शो।

मेकेर रे पा अदेन माइशशो यमन रागीमी जाकदीशशा, मेकेर काबु नांडसाक्क। खोइलीमी खप थेक्चा मतशो शुश दुम्शो खोदेशो लाक्शा “मुल दा खपीमी गाक्चा ताइतक” दे थाम्पान ग्येरशा, जहाज रे तोइशशा खपमी एर ओंथ गाक्तक। तन्न मेकेर गोरशो रागी बाक्तीके इच्का मरिम्शो लाक्ती। आ दीसा मेकेर रे जहाज डोइशशा सुइच केनल जाकदीशशा नांडसाक्क। तन्न मेकेर आंड कली तोंइसीचा मगेम। मेकेर रे पा मेडिटारियेन माइशशो समुन्द्रम जाकदीक्कानु, शुश रेउ यिशा फश गिवार पाप्तु। आंड डोइशशो जहाज पेरा गे राक एशशा, गोल्चा डा पा गाक्त।

मेना गोपुकी नेल्ल शुश हिंतक। हिंना हिंन बल बल पा जिवरल्टार जाकदीत्तक। मोपा आंड गाक्शो ३१ नाक्तीमी नाक्दो डा ७ बजे लिभरपुलमी जाक्शा तोंइसाक्क। मिनु मेकेर रे रेल डोइशशा तालीम पतीक ठाउं हाइथ माइक्तीकेम जाकदीत्ती। मेकेर अरु नेपाली सां यो बाक्तेक्म। मेको आन कली ग्रुम्शा, थाम्पा ग्येरसाक्यी। आं पचा माल्शो तालीम नाक्त सां डोंइती कना दुम्चा गोवा बाक्त। मिनु गोम “मिश डोन रे



हाइथ केन्टमी सिग्नल तालीम थुम्ची नाक्त

जाक्ती, मुल तालीममी पास दुम्नुडा, कों मदुम्नुडा” दे शुश सुर्ता पाता। तन्न गो रिम्शो पा पास दुम्ती।

मिनु सिडगापुर लाइब जहाज महिना का नोले ला लाइक्ब दुम्तीके आं कली महिना का कली स्कटलेन्ड डा ब्रदर युनीटम बाक्चा कली सोइक्ताक्यीमी। मेकेर रे लचा कली लन्डन डा गुजस्टेड माइक्तीकेम नाक्दो का इप्ती। मेको बाक्तीक थम आगा सुरुड खोदेशो बाक्त। मिनु आंड बाक्तीके आ तारीम मार कका गाक्शो शुश रेयके नेंसाक्व। मिनु गो मेकेर बाक्ब आन कली हिल्लो पडानु “एको आंड बाक्तीक खप आगाम बाक्ब। मिनु एको आ तार रेल गाक्ना गाक्न बाक्ब। एको रेल गाक्शो रेयके बाक्ब” देंतेक्म।

महिना का रिम्तीक नाक्ती

आ दीसा सुनी रेजिमेन्ट सारजन मेजर का जाकत। मेको नोफा सम्म जाकदीशशो गलशोके पाइशशो थम हिंचा डा मुर का बाकत। मेकोमी आं कली “कोप्रोल मोहन माइशशो गे नवे?” दे हिल्लो पती। मिनु गोम “ओं नड” देंडानु मेकोमी आं कली “दीसा सुनी गे रेल डोइशशा १० बजे इसकोटलेन्ड डा लनारक माइक्तीके रेल इसटेसनमी जाकदीत्चा माल्नेवे। मेकेर इ कली मुर का ब्रथ जाकब। रेल रे तोइशशा मेको मुर मजाकम सम्म तेइ मलथु मेकेरन रिम्शा बाकको” दे माइक्ती।

मिनु अर्को बुश मिक्च सिपाइ का कली “एको मुर कली रेल इस्टेसनमी चाकदीशशा रेल डोइक्पाइशशा सोइक्ती। एको आ मार मारपुकी रिम्शो पा वोइशशा गेशा, मेको वोइक्तीक ठाउं कौंइदो। मिनु आ नित्तीकेमी निप्पतो। मिनु रेल गाकम नोले लेशशा पिशा आं कली रिपोट गेयी” दे माइक्ती।

मिनु आं कली मेको बुश मिक्चीम रेल इसटेसन चाकदीशशा रेल डोइक्पा सोइक्ताकयी। मिनु आ दीसा सुनी लनारक माइक्तीके रेल इसटेसनमी जाकदीशशा रेल रे तौंइसाकड। मोपा तौंइसीडानु, लेन्सकोप्रोल का यो थे जाकत। मिनु मेकोमी आं कली “गो इन कली ब्रथ जाकशो नड, लो लस” दे आं बाकस कुरशा गाडी डोइक्चा कली वारच पाइक्ती। क्याम्पमी जाकदीडानु मेकेर नेपाली मुर निक्शी यो बाक्ताक्स। मेको निक्शीमी का १/७ जी.आर डा पी.टी.नु अर्को चहिं एम.एम.जी के कोरस पने थुम्शा सिङगापुर लचा कली नाकत सां डौंइती कना मेकेर जाकशा बाकशो बाक्ताक्स। मेको आस कली थिदुनु “नेपाली वारच थित्ता” दे थाम्पान ग्येरसाकयी।

दस आग्या नु बेनहर सिनेमा

मेको निक्शी ते ते हिरथ लचा देंशा, हिरथ गाक्ताक्स। गो चहिं लचा मदाक्थु मेकेर डा लनारक बजार पित्थी आं का हिरना हिरन बाक्ती। मेको बजारमी सेनीमा कौंइबाक्तेकम। गो यो मेको सेनीमा का कलीन नाकत किंत किंत लना लन कोव्रता। मेको सिनेमा कली नेपालीमी “दस आग्या” देंबाक्तेकम। मिनु अंग्रेजीमी “टेन कमान्डमेन्ट” देंबाक्तेकम।

मिनु मेको वारच जाकसा नोले मेको आस कली मेको सेनीमा आ पबर्म लोव्र पा “मेको सेनीमाम थाम्पा सक्ति पाइशशो मुर का बाकत। मेको कोर पशो मुर आन बाक्तीक पुक्खी आगाम ओव्रत। मेको कोर पाइब मुरपुकीमी “मपिव” देंतेकम हना यो, मेकेर लशा मेको रोइ पाइब आन कली थिशा सापाइक्ती। थमान मेको मुर थमा पा ठेयब सक्ति पाइशशो बाकत। तन्न मेको कली मुरपुकीमी शीमी केप्शा कांटी थोक्शा साइक्तेकम” दे माइक्तासी। मेको नेंशा वारच कामी “मेको दा बुश मिक्च आन देवता बाकब” देंत। गो चहिं नाकदो इम्डा नु यो “मोदेंशो रिम्शो मुर कली मारदे सदमे माइ” दे मिम्ना मिम्न इप्ती।

काबु नाकदो गो डोमु का ताता। मेको डोमुमी गो सफा मपाइशशो शुश रवा आन दाते रे गाकना गाकन बाक्ती। आं गुइ का कली फलाम के ग्याइतीके कामी ग्याइशशो बाकत। तन्न आं कली ग्याइक्ब मुर कली चहिं मतड। मोपा लना लन बाकडानु, आं ग्युरा रे रवा आन दाते रे पा नां आ छेडछेड थिशा आं कली थिती। मोपा थिथीनु गो दा फू खोदेंशो पा थम सोपी दुम्शा बेरशो खोदेंशो पा डौंइती लशो ताता। मिनु ब्रड सेंसाकड। थमा सुइक्ब दुम्डा नोले ला ‘परमप्रभुमी आं कली योव्रशा आं गुइमी ग्याइक्ती बाकत’ दे तुइक्ताकड।

फुटबल

मोपा तालीम थुम्शा महिना का रिम्शा बाक्डानु, नाक्त किंत किंत सिनेमा कोव्रचा नु फुटबल ग्यारशो कोव्रचा डा लशा अरु मारेइ गेय मबा। मेकेर गो फुटबल ग्यारशो शुश कोव्रचा ताता। फुटबल ग्यारशा दातेमी नाइक्ची ना चार जना मुरुमी ठेयब बुश वा का कली चार सुरमी ग्याइशशा मेको ग्यारतीके आ एर औथ गाक्बाक्तेम। मिनु कोव्रब मुरपुकीमी मेको वामी मुप्स यिशो खोदेशो पा क्येट बारशा गेबाक्तेक्म।

मिनु अर्को छक लाक्चा डा लोव्र मार बाक्त देशा हना, सुर का रे टिन के डब्बा कामी क्येट कुर पना पन अर्को कली चोना चोन अर्को सुर चाक्दीप्बाक्तेक्म। मिनु अर्को छेउ रे अर्को लाइन रे डोइती डा खोदेशो पा क्येट कुर पना पन वारच कली चोक्बाक्तेक्म। मोपा नेल्ल मुरपुकीमी थम ग्येरसीशा क्येट गेबाक्तेक्म। गो यो मेको आन कली थमा पान ग्येरशा क्येट गेतामी। मोदें फुटबल कोव्रडु कोव्रडु गो यो मेको आन बुद पा फुटबल ग्यारड ग्यारड दुम्ती।

काबु सुनी पिउन का जाक्शा, आं कली “आजुटनेमी इ कली दस बजे आ अफिसमी गुम्थ पिव ने” दे माइक्ती। मिनु गो दस बजे मेकेर लती। मेकेर जाक्दीडडानु, मेकोमी आं कली “इ युनीट रे चिठी का जाक्शो बाक्ब। मेको चिठीमी सलसवरीमी ए. बी. सी. तालीम दुम्चशो बाक्ब। इन कली मेको तालीम यो थुम्शा ला लेत्चा देशो बाक्ब। मोपतीके आप्खे चार बजे मेकेर लचा माल्नेवे” दे माइक्ती।



२०१०/१६ लनारकमी काबु सुनी

मिनु गो मेकेर लचा कली आं मार मार नेल्ल ठीक ठाक सेल्शा मेकेर लती। मेकेर जाक्दीशशो नाक्त सां नोले तालीम पचा गोम्तेक्म। मेको शेंतीकेम एटोम बम नु केमीकल आ पर्बम शेंसीचा माल्शो बाक्ब। मोपा गो डोमुम यो मतशो मतुइशशो नेल्ल कोव्रचा तचा ताता।



सलसवरीम ए.बि.सि. तालिम शेंशो आं कोठाम लेंशा कोशो

शेंतीक क्लास नुम नोले गो नु काथा शेंसीब कोपर टोड माइशो वारच कामी आं कली आं मजोक्शो नेल्ल शेंचा कली वारच पाइक्ती। स्लाइड रुल माइशो रडकर गुंइचा थम श्येत बाक्त। मिनु गो आंखा आंखा इच कका पा नेल्ल जोक्ता। मोपा जोक्ब दुम्डा, नोले गो निक्शी बजार हिरथ लाइतस्कु। मोपा हिरची ना मेको कली बेनहुर सिनेमा डा परमप्रभु आ पर्वम हिल्लो पाता। मिनु मेकोमी “मेको दा रागी नेल्ल सेल्ब परमप्रभु बाक्ब” दे माइक्ती। मिनु बेनहुर माइशो मेको सिनेमा लेंशा बजार पित्थ कोव्रचा तांइसीबा कों” देंडानु “मेको दा महिना का सम्म कोंइशा लने थुम्तु। मुल दा मबाक्ब” देंत

आं पचा माल्शो तालीम दस नाक्त डा बाक्त। डोंइती डोंइती मेको तालीम पचा थाम्पा श्येत दुम्त। तन्न नुप्चीना थम रिम्शो पा थुम्ता।

मोपा तालीम थुम्शो नाक्त सां नोले साउथहाम्टोन माइशो जहाज डोइक्तीक जाक्शा, जहाज डोंइसाक्यी। जहाज उइ नाक्त का नु नाक्दो का बाक्शो नोले ला जहाज सिङगापुर लचा कली गाक्त।

डोंइती कुशो क्येडा लेशो नु थम रिम्शो दुम्त। मिनु डोंइती क्येडा नाक्त सां डोंइतीन सिङगापुर जाक्दीशो। मेकेर रे रेल डोइशशा क्याम्प जाक्दीत्ती। मेक जाक्दीडानु डोंइती डा वारचपुकी नेल्ल फांइसमा बाक्त।

पल्टनमी बाक्डानु वारच वारचपुकीमी “प्रमोसन दिक्चा माल्त हना, सिग्नलमी लचा माल्ब। मिनु सिटरोल लाल सेल्चा दाक्शा हना एम. टी. मी लचा माल्ब” दे शाक्मुतीक लोव्र बाक्त। गो सिग्नलमी लती। तन्न आं कली दा रिम्शो लाक्ती। मेकेर रे तालीम पथ बेलायत यो लचा ताता।

बेलायत सिग्नल कोरस थुम्शा लेशशा जाक्शा मलायामी बेनडीट डा लडाइमी लती। लडाइमी टेक हेडक्वाटर ते ते लमे मेक मेक कन्ट्रोल अपरेटर दुम्शा लती।



फुटबल ग्यारब दुम्शो

सिगनलमी गेय पना पन बाकडानु, मेको आन के फुटबल टिममी गोल क्किपार दुम्शा, ग्यारचा ताता। मेकेर गो रिम्शो ग्यारतीके हेटकोवटर डा आन टिममी योव्रचा पुंडसाकड।



२०१८ द परकर कप सिंगापुरमी

मेको टिम रे पा गोपुकीमी नेल्ल आन कली ग्राशा ठेयब इनाम यो ताइतक। मोदें ग्राशो आ पबर्मी आंइ कली ठेयब भोज का यो गेम्तेकम। मोपा कम्पनी डा आइक्च टिममी ग्यारडा ग्यारडा नोले बटालाइन डा ठेयब टिममी ग्यारचा कली योव्रचा पुंडसाकड। गोल दुम्चा मगेथु फुटबल फी ग्याइक्तनु, कोव्रबपुकीमी आं कली “सेबास सन्तानब्बे” दे ग्रिमानु गो थाम्पान ग्येरशा आं खोइली खपीमीन मबाक्शो खोदेंशो लाक्ती। मोदें ग्यारना ग्यारन लडानु, आं के प्रमोसन यो दुम्ना दुम्न लत। मिनु अफीसर दुम्डा नोले दोम्ना दोम्न यो लती।


२७ तारीख १९५६ सेप्टेम्बर डा नेपाल कप सिङगापुरमी ग्यारथ लती। मिनु मे नोले फुटबल ग्यारचा प्रौइता।

आं डोइश्शो हवाजाज हेरा बुक्शो

२०१३/७/२२ गते आं मान बारशा सिगनल सारजन दुम्ती। २०१७/३/२४ गतेमी नोर्थ बोरनीओ कोटावेलुदमी बटालाइन टेकहेड क्वाटर महिना सां सम्म तालीम पचा कली लत। गो आं कली यो मेकेर वेभरली माइश्शो हवाजाजमी लाइक्तीमी। महिना सां नोले तालीम थुम्शा मेको हवाजाजमी लेत्तक।

लेककानु सिङगापुर २ बजे सुनी जाक्शो तन्न आंइ डोइश्शो हवाजाज नाइक्चा कली मेको आ चक्का मगू। मिनु पाइलटमी “मुल पेट्रोल मनुम्मे सम्म सरीडमीन बेरपा बाक्नुड। पेट्रोल नुम्मे नोले हवाजाज कली रिम्शो पा ओंखाचा नाइश्शा कोव्रनुड। दोकका पा मारेइ दुम्त हना, मार पचा डा नेल्ल काले बेक्चान माल्ब” देंत। मोदेंमेनु गोपुकी नेल्ल थाम्पान हिंतक। आंइ हवाजाज दोकका पा बुक्बा कों देंशा हवाजाज गिरानमी रोइ पाइब मुर कुरब नु मी काप्ब गाडीपुकी शुश देल्शो बाक्तेकम।

मिनु पाइलटमी हवाजाज कली ते ते हिरशा पेट्रोल थुम्शा चाक्शा ओंखा पा हवाजाज गिरानमी नाइक्ताक्व। मिनु मारेइ मदुम। मेना ४ बजे बाक्त। घन्टा निक्शी सरीडमी हिंरना हिरन एर ओंथ हिरशा बाक्का बाक्त।



बी. कम्पनीमी याक्सीशो



२०१६/१२/२३ हडकड होतोड हाउसमी सारजन मेजर दुम्चीना

२०१७/१२/१७ गतेमी आं मान बारशा सी.क्यु.एम.एस. दुम्ती। मिनु लेंशा आं मान बारशा कम्पनी क्वाटर मास्टर दुम्शा बी. कम्पनीमी याक्साकड। मिनु मे नोले २०१६/७/२० मी लेंशा आं मान बारशा, कम्पनी सारजन मेजर दुम्ती।

बारु बारु डा लडाइ

२०१६/१०/२० गते गो आंइ बी. कम्पनी बुरनाइ डा पिप आ रागी बारु बारु माइक्तीकेमी लडाइ पथ लाइतक। मेकेर डा नेल्ल आन क्येडा ठेयब कमान्डो आ नें यासिन ए. फेनडी बाक्त। मेको कली ग्याइक्चा माल्शो बाक्तक। कोइ बेला हवाजाजमी ठेयब बत्ती सरीड रे तोक्शा गेवानु, गोपुकी एर ओंथ समुन्द्र ते ते कोव्रचा माल्तक। शुश नाक्त नोले फोर प्लाटुन डा नैन बहादुर राइमी मेको आ तिग्रामी गोली ख्रप्पाइश्शा घाइते सेल्लु मिनु ग्याइक्ताक्क। मेको आ पर्वम मेको राइमी मिलिटेरी मेडल यो ताप्तु। मिनु गोपुकी २०२०/३/१३ गतेमी आंइ पचा माल्शो पने थुम्शा मेकेर रे

लेत्तक। मिनु मलक्कामी बाक्ची ना २०२०/८/२३ गते आं मान बारशा लेप्टेन दुम्ती। मोपा मान बारशा बी कम्पनी डा फोर प्लाटुन डा कमान्डर दुम्ती। २०२०/११/५ नाक्तीमी लेंशा लडगपसियार माइक्तीके रागीमी लचा माल्तक। मेकेर क्याम्प सेल्शा बाक्तक। मिनु मेकेर रे पलटन पालो



हेलीकप्टरनाइक्तीक सेल्शो

पा दुस्मन आन कली माल्थ लाइतक। रासन नुम्मे नु हेडक्वाटर रे रासन पुंइचा माल्त। मिनु लेत्ची ना हेलीकप्टर कली ब्रेशा, हेलीकप्टर रे लेत्चा माल्त। मोपा लेत्ची ना हेलीकप्टर नाइक्तीक आंमन सेल्चा माल्तक। मोपा सेल्चा कली ठेयब ठेयब रवापुकी तिम्शा दिंम सेल्चा थम मुस्कील बाक्त। दिंम रिम्शो मबाक्त हना, हेलीकप्टर नाइसीने मचाप्यु, लेशशा लाइबाक्त। मोपतीके थम रिम्शो दिंम सेल्चा थम अपठेरो बाक्त हना यो, नेल्ल गारशा सेल्लतक। मिनु हेडक्वाटरमी लेत्तक।



२०२० माघ लडपसीआरमी प्रिन्स फिलिप नु

हेडक्वाटर जाकदीशशो आ नित्थ नाक्ती बेलायत डा रानी एलीजाबेथ आ वोंइश प्रिन्स फिलीप आंइ कली ग्रुम्थ जाक्त। मेको जाकमेनु, गो थाम्पा ग्येरसाकयी। मिनु इच्का नाक्त नोले बटालाइनमी लेत्तक।

इन्डोनेसीया डा लडाइ



२०२१ माघ टेवेडुमी

२०२१ माघमी गोपुकी फोर नु फाइब डा पल्टन निक्शी नु कम्पनी कमान्डर नोर्थ बरनीउ डा टेवेडु क्याम्पमी लचा माल्तक। मेकेर रे इन्डोनेसीया आ सिमानामी दुस्मन आन कली योत्रकी पथ लचा माल्तक। मेकेर लशो आ निक्शी नाक्तीमी इन्डोनीसीया डा दुस्मनपुकीमी श्री इन्च मोटरमी आंइ कली आप्तेक्म। गो आंइ एर ओंथ नेल्ल बम पुक्तेक्म। तन्न मेकेर ब्वाकी बाक्शो बाक्तीके सुइ कली मारेइ मदुम। दिंम बाक्शो हना शुश मुर आन कली ख्रचा डा बाक्त। गो आंइ क्याम्पमी ५०५ तोप गन बाक्तेक्मे। लडाइ पाइब गोरा आन हुल का के कमान्डरमी वारच पाइय्यीकी दे पुंइतु। मिनु मेराउ माइक्तीके ठाउंमी बम का तोक्तु मिनु लेंशा बम मबु।

मिनु २०२३/४/७ मी आंइ कली अर्को पलटनमी पालो गेथ जाक्तेकम। मिनु गोपुकी आंइ बाक्तीक मलाया डा सुडगैउढाडमी लेत्तक।

पलटनमी बाक्ची नाक्तपुकी योल्ना योल्न लाम्तेकम। गेना १५ बर्स जाक्दीप्बा डा पेनसन मीबा, दे मिम्शा लां कोव्रना कोव्रन बाक्डानु सार्जन दुम्ती। मिनु लेंशा आं मान बारशा स्टाफ सार्जन दुम्ती। मिनु नोले डब्लु टु यो दुम्ती। मे नोले गेना १८ बर्स जाक्दीप्बा देंना देंन बाक्ती।



१८ बर्स जाक्दीम्मेनु अफिसर यो दुम्ती। मोपा अफिसर दुम्डा नोले “मुल २८ बर्स रिम्चा माल्ताकयी” दे रिम्ना रिम्न बाक्डानु २७ बर्स यो जाक्दीत्त। मिनु “मुल दा गो खुर्पो यो दुम्ती। मुल खिं लचा दुम्ती” दे पलटन प्रॉइशा खिं कुती। खिं कुची ना सम्म आं के तमी सां नु तौ निक्शी दुम्तेकम।

गाउंमी येसु आ लोव्र ब्रशो

२०३० साल डा लोव्र बाक्ब, नबीन नु सनत थमा सुइक्ब दुम्शा, गाउंमी जाक्शा येसु आ पर्वम लोव्र फ्राम्ताक्स। मेना बेद बाहादुर बकान्छा चहिं परनामी धर्म पशो बाक्त। मेको बकान्छाम आं कली यो परनामी पवल दे मिम्ना मिम्न बाक्त। २०३१ साल डा लोव्र बाक्ब, आं जेठी तमी सोब्रु अस्पतालमी नर्स बाक्त। मेको मेकेर थमा सुइक्ब दुम्माक्त। मेना माइली तमीमी परेस मजोक्ब मुर आन कली ननाक्दो पढेचा शेंना शेंन बाक्त। मोदें पढेचा शेंची ना मेकोपुकी गारशा येसु आ पर्वम शेंब आन लोव्र नेंचा कली लाइबाक्मा बाक्त।

मोपा लमा लमा माइली तमी नु कान्छा तौ थमा सुइक्ब दुम्ताक्स। मोदेंशो पा तमी तौपुकी का का पा थमा सुइक्ब दुम्तेकम। जेठा तौ यो हडकडमी थमा सुइक्ब दुम्शा, ब्वाक्कुम खुम्शा ग्रुंइपाइक्से बाक्त। सु सु थमा सुइक्ब दुम्मा, मेको आन लोव्र नु आन पतीक नेल्ल डौइती क्येडा रिम्शो दुम्ना दुम्न लाम्तेकम। मोदेंशो तडानु “एको आन थमा सुइश्शो परमप्रभु थमान रिम्शो परमप्रभु बाक्मे कोरो मे” दे मिम्ताकड।

माइली तमी थमा सुइक्ब दुम नोले गाउंमी येसु आ पर्वम श्येत जाक्तीके आ इस्कूल शेंतीक गेय प्रॉइशा, काठमान्डु पढेथ लत। मिनु मेकेर जाक्दीश्शा, ब्वाक्कुम खुम्शा ग्रुंइपाइसे बाक्त। मेना कान्छा तौ नक एस एल सी थुम्शा, खिंमीन बाक्त। कान्छी तमी चहिं सांघुटारमी पढे पना पन बाक्त।

गो थमा सुइक्ब दुम्शो लोव्र

२०३७ साल डा लोव्र बाक्ब। पास्टर नबीनमी पास्टर इजिकीएल कली कुरशा गाउंमी जाकत। मेना गाउं डा कोइ मुरपुकीमी थमा सुइक्ब दुम्शा, ब्वाक्कुम खुम्शा गुंडिचा पुंडिसाक्म।

काबु आं मीश नु गाउं डा नेल्ल क्येडा ठेयब मुर आ मीश, थम मरिम्शो पा जिम्ताक्स। मेको आ पर्बम कछरी यो वोइक्तेक्म। कछरीम थम मरिम्शो पास्तेक्म। मेको आ इक्का नोले आं जेठा तौ आ तमी छिन का डा रोइमी बेकत। मेको बेकमेनु, गाउं डा मुरपुकी आं खिंम जाक्तेक्म। तन्न थिम्थ लची ना गाउं डा मुर नेल्ल का का पा आन खिं लेशशा लाम्तेक्म। मारदे हना आं चैमी जेठी यो थमा सुइक्ब दुम्शो बाक्त। मिनु चैमीमी “आं तमी कली थमा सुइक्बपुकीमी प्रार्थना पा थिम्चा” देंत।

मेना गाउंमी थमा सुइक्बपुकी का निक्शी ला बाक्तेक्म। मेकोपुकी जाक्शा, प्रार्थना पशा, बाकस सेल्शा आल कली मेको बाकसमी कुर पामेनु, गाउं डा मुरपुकी का का पा आन खिं लेशशा लाम्तेक्म। मिनु मो पशो तडा नु “गाउं डा मुरपुकीमी गो आंइ कली थमा सुइक्ब दुम्शो बाक्तेक्म, देंशा तिल्ला वोदमे बाक्त” दे मिम्ताक्ड। मो दुम्शो साता का नोले पास्टर नबीन यो काठमान्डु रे जाकत।

मिनु गाउं डा मुरपुकी ब्वाक्कुम खुम्शा गुंडिपांडिसीचा कली शुश लोव्र पमुम्तेक्म। २०३८ साल २२ गते नाक्ती डा लोव्र बाक्ब, गोमी आं मीश नु चैमी लोव्रसी पना पन बाक्सानु, आस लोव्र नेता। आं मीशेमी चैमी कली “इचीना इ वोंइश परदेसमी बाक्ब। इ वोंइश जाक्म नोले ला मेको कली हिल्लो पा ब्वाक्कुम खुम्शा गुंडिपांडिसो” दे मदा नु चैमीमी “आमा गे ब्वाक्कुम खुम्शा गुंडिपांडिसीनीनु गो यो मुल कन गे नु काथा ब्वाक्कुम खुम्शा

जेठी तमी यो सोब्रु असपताल रे काठमान्डु पढेथ लशो बाक्त। मिनु काले छुट्टी दुम्मेनु माइली नु जेठी तमी निम्फा काथा खिं जाक्ताक्स। मिनु मेको निक्शीमी येसु आ पर्बम लोव्र पा “गो नेल्लेम येसु कली थमा सुइय्य” देंताक्स। तन्न मेना गो “गो साठी बर्स गाम्डा नोले ला थमा सुइक्ब दुम्नुड” दे माइक्तासी। एको लोव्र माइली तमीमी काठमान्डु जाक्दीशशा, पास्टर कली शेंदानु पास्टरमी “इ आफ आप्खेन बेक्चा माल्त हना, मार इ आफोमी परमप्रभु कली थिन्ने चाप्वा डा?” देंत दे आं कली यो नेंपाइक्तीमी।

गोमी साठी बर्स जाक्दीडानु ला थमा सुइक्नुड दे लोव्र निक्शी आ पर्बम देंती। लोव्र का, मेना गो शांबु राकसी थाम्पान तूब मुर बाक्ती। आं बगे १०६ बर्स सम्म ब्रोंइशो बाक्त। शुश मुरपुकी बगे आ आसीक पुंडिथ जाक्शो गो मुल यो मिम्नुड। मोपा जाक्मानु, काबु आं बडो कामी मार देंत देंशा हना “मुल गो ६० बर्स जाक्दीत्ती। शांबु राकसी के छुध्दे का यो मपड। राकसी शांबु काइ तूतू मदाक्ड” देंत। मोपतीके गो यो ६० बर्स जाक्दीडानु शांबु राकसी का यो मतुथु यावे आ देंशो पने चाप्नुड” दे मिम्शा मो देंती। मारदे हना मेना आं कली खमे खाइ मबाक्त हना, मारेइ मसुदु, तन्न शांबु राकसी चहिं मबाक्थुन मदुम्ब खोदेंशो दुम्शो बाक्ती।

आं मीश आं क्येडा शुश तूब बाक्त। मोपतीके “गो निम्फामी ६० बर्स जाक्दीस्कुनु, शांबु राकसी तूचा ममाल्थु रिम्शो पा कालेम थमा सुइक्ब दुम्चा” दे मिम्शो बाक्ती। अर्को लोव्र का चहिं मेना आं आफ सुन्दरेमी पोंइब बाक्त। मिनु गो जेठा तौ दुम्शा आफ आ किरिया मपाता हना, गाउं डा मुरपुकी नु आं लोक्बपुकीमी आं कली तिल्लीम” दे हिंशा मो देंती। तन्न गो ५३ बर्स जाक्दीडानु आं आफ बेकत। मोपा हिंतीक लोव्र का नुप्त।

गुंडपांडसीनुड” दे माइक्तु। मोदें सल्ला पशा मेको निक्शीमी डोको का का मोल नु अर्को जोर का का वा कुरशा कैजले माइक्तीके खेतम लाम्ताक्स।

मिनु गो यो जोर का वा कुरशा कैजले खेत लती। मेकेर जाक्दीशशा, पोकली खोला गे कोव्रडुनु, मेकेर शुश मुरपुकी देल्शो बाक्तेक्म। मेको आन कली तडानु “इन कली डोन रे ब्रेशशा चाक्शो गे आं गेय पाइब बाक्नीनी। गो इ कली योव्रता। मिनु मप्रोंइनन” देंशो यसैयाम ब्रेक्शो लोव्र एकोन बाक्माक्त दे ती फ्रुक्चा पित। (यसैया ४१: ६)

मिनु परमप्रभुमी आं कली मताइशशो बाक्माक्त दे मिम्शा, गो यो खोलामी लशा ब्वाक्कुम खुम्शा गुंडपांडसाक्यी। मेको नाक्ती ब्वाक्कुम खुम्शा गुंडपांडसीबपुकी ६ ओटा खिं डा १६ जना दुम्तक। मोपा गो परमप्रभु कली तुइशशा आ मुर दुम्चा कली ६० बर्स रिम्चा ममाल्दी।

गुम्तीक खिं सेल्शो

डोंइती २०३७ सालमी मुर निक्शी ब्वाक्कुम खुम्शा गुंडपांडसीशो बाक्ताक्स। तन्न आंइ गाउंमी गुम्तीक खिं मसेल्शो बाक्त। गोपुकी ब्वाक्कुम खुम्शा गुंडपांडसीशो नोले गोपुकी शुश दुम्तक। मिनु गुम्तीक खिं सेल्शा मेको आ नें “बेथानी” वोइक्तक।

शांबु तूब आं वारचपुकी

मिनु ब्वाक्कुम खुम्शा गुंडपांडसीशो आ नित्थ नाक्त गो धरान लती। मारदे हना आं पेरा बलामी गिर्खा का ग्रूशो बाक्त। मिनु मेको अपरेसन पचा कली धरान मलथु, मदुम्शो बाक्ती।

मोपतीके लिनु कान्छा कली वारच लाइशशा धरान लती। मेना धरान लचा कली गोदार रे पा लचा माल्बाक्त। मेकेर जाक्दीत्चा कली आं खिं रे चार नाक्त गाक्चा माल्ब।

साइ लाहुरे बाक्डानु, मेको लां शुश गाक्शो नड। मिनु मेको लां डा शुश मुरपुकीम आं कली तुइक्नीमी। साइ मोपा गाक्डानु, शुश शांबु राकसी तूशा दुक्ना दुक्न नेल्ल आन कली शांबु तूचा योक्ना योक्न शुश वारच सेल्शो नड। मिनु गो मेको पित्थ जाक्दीडानु मेकोपुकीमी साइ डा खोदेंशो मिम्शा “शांबु तूतीक वारच जाक्त” दे थाम्पा ग्येरसाक्म। गोमी मेको आन कली “गो शांबु तूचा ताइक्ताक्ड। मारदे हना गो येसु खीस्त कली थमा सुइक्ब दुम्ती” दे माइक्तामी। डोंइती मेकोपुकीमी आं कली काइ यो थमा मसुइय्यीमी। नोले चहिं थमा सुइक्तेक्म। मिनु आन छक लाक्तेक्म।

गोदारमी यो आं के शुश शांबु तूब वारचपुकी बाक्नीम। साइ गो मेकेर पल्टन रे कुडानु, नाक्त निक्शी सां सम्म शांबु दुक्स डा दुक्स पा बाक्तक। मेकेर जाक्दीडडानु, मेको वारचपुकीमी यो आं कली शांबु तूचा कली ढिपी पाम्तेक्म। मेको आन कली यो गो थमा सुइक्ब दुम्शो लोव्र शेंताक्डमी।

मेकेर डा वारचपुकीमी “एको कली मुल नाक्दो गो नेल्ल गारशा शांबु तुंइचा माल्ब” दे सल्ला पाम्तेक्म। मोपतीके गो नाक्दो दुम्चा क्येडा डोंइतीन लिनु कान्छा कली हिक्सी ग्याप्शा सोइशशा, गो चहिं मेको आन मतुइक्चा डा पा बन्दीपुरम लशा बाक्ती। आ दीसा धरान जाक्दीडडानु, काइली बहिनीमी रीब रीब पा लाम्जी नु डब्का का राकसी यो गेती। मिनु गोमी बहिनी कली “गो राकसी तूचा ताइक्ताक्ड” दे माइक्ता।

मो देडानु, बहिनीमी राकसी लाइशशा, डब्का का निघार पिशशा गेती। मिनु गोमी “मुल गो येसु ख्रीस्त कली थमा सुइक्व दुम्शा, शांबु राकसी नेल्ल तूचा ताइक्ताकड” दे माइक्ता। मो देडानु बैनीमी “गेम शांबु तूचा प्रोंइतीवी दे दोपा थमा सुइक्चा” दे काइ थमा मसुद। मेकेर डा वारचपुकी नेल्लमी यो मोन देंम्तेक्म। गोमी शांबु तूचा ताइशशो तशा, नेल्ल आन छक लाक्तेक्म।

आ दीसा अस्पताल लशा गिर्खा अपरेसन पाता। डाक्टरमी “दीसा जाक्को” दे माइक्ती। मिनु आ दिसा लडानु, डाक्टरमी “नेल्ल रिम्शो बाक्ब गे खिं लेन्ने चाप्नेवे” दे माइक्ती। मिनु गो खिं लेत्ती।


नाक लां रे खिं लेशशो

मिनु खिं लेडानु डोंइती यिशो लां रे मलेत्थु, अर्को नक लां सिन्धुली रे पा लेत्ती। मारदे हना डोंइती डा शांबु तूब वारचपुकीमी श्येत गेनीमी कोरोमे दे मिम्ताकड। मेको नक लां गेनायो मगाक्शो नड। मोपतीके आं कली सुइमी मतुइक्नीम दे मिम्शा, मेको लां रे लेत्ती।

सिन्धुली लचा कली लालगढमी अर्को गाडी का नु फाइक्चा माल्बाक्त। मिनु मेकेर जाक्शा गाडी रे तोंइसाक्यी। मिनु गेनायो मजाक्दीशशो ठाउंमी ‘मुल ते लचा’ दे एर ओंथ कोवना कोवन बाक्डानु, सांघुटार डा केदार कली ताता। मिनु मेकोमी आं कली “ते गाक्डे?” दे हिल्लो पती। मिनु गोमी “धरान रे कुती मुल खिं लाइनुड। गे चहिं ते रे जाक्डे” दे माइक्ता। मिनु मेकोमी “गे मतुइक्नेवे गो एकेर जाक्शा हुटेल दाइशशो बर्स निक्शी दुम्त” देंत।

मिनु मेको नाक्दो मेको आ हुटेलम बाक्ती। मेकोमी “सिनाक्त मुलाक्त आंम गित्चा गाक्चा मदुम्ब। सिन्धुलीमी लालमान

माइशशो मुरुमी यो हुटेल दाइशशो बाक्ब। मेको आ हुटेलम बाक्को। मिनु मेको कली “कुरब मुर का माल्शा गेयी” दे मतो। आंमा ममलो, मरिम्शो मुर ला शुश बाक्नीम। गे मतुइक्नेवे। मेकोमी आ तुइशशो मुर माल्शा गेब। सिन्धुली रे सुनी कना गाक्तीनी हना, नाक्दो बास बाक्चा कली रामेछाप जाक्दीत्नेवे। मिनु रामेछाप रे इ खिं सजिलो पा जाक्दीन्ने चाप्नेवे” दे माइक्ती। मिनु गोमी मेको आ देंशो बुद पा पाता। मिनु रामेछाप रे आं खिं नाक्तीन जाक्दीत्ती।



मन्डली डा शेंब दुम्शो



वाच्यु मन्डलीमी शेंशो

मेना गाउंमी ६ वटा खिं डा मुरपुकीमी थमा सुइशशो बाक्तक।
मिनु गोपुकी पालो पा खिं खिं हिरशा ना नाकदो बुक्शा सडगती
पाइतक। सनत, आंइ कली शेंब बाक्त।

तन्न सनत आंइ गाउंमी ला मबाक्थु, एर ओंथ डा गाउं मेर यो
शेंथ लत। मोदें सनत मबाक्मेनु नेल्लेमी आं कली “लो नेल्ल

क्येडा जोक्ब तुइक्ब गे ला बाक्नीनी, सनत मजा। मोपतीके
गेमीन गो आंइ कली शेंदीकी” देंतेकम। थमान मेना गाउंमी
इस्कुल लशा शेंसीशो जोक्ब मुर सुइ



ओखलढुङगा डा मन्डलीमी

मबाक्म। गो यो गेनायो इस्कुल मलशो बाक्ती हना यो, लटर
पटर पा शेंचा गोता।

ना नाकदो फिबा रेडियो रे प्रभु आ पर्वम शेंशो लोव्र जाक्ब दे
तुइक्ताकड। मिनु मेको जाक्मेनु, टेप रिकर्ड पा वोइक्ता। मेकोमी
आं कली सनत मबाक्मेनु, कुम्सो पचा नु प्रभु आ लोव्र शेंचा
कली शुश वारच पाइक्ती।

थमा सुइक्व आन कली शेत जाक्शो

मेना पन्चायती सासनमी येसु कली थमा सुइक्वा नु सडगती पचा मगेम। गोपुकी खिं आगामी सडगती पना पन बाक्कानु, लाङ्गामी कुचुम होक्त हना, 'लल पिया जाक्मा कोरा में' देंशा थाम्पा हिंन हिंन सिक्सी पा कुम्सो नाइश्शा बाक्ताक। सुइ मजाक्मानु, लेंशा कुम्सो पाइतक। गोपुकी मोपा सडगती पका नु गाउं डा मुरपुकी नेल्लेमी "एको दा नेल्ल क्येडा आइक्व जात डा मुर आन मानेतीक धर्म बाक्व। मोपतीके एको आन थिशो ब्वाक्कु तूचा मदुम्ब। मिनु आंइ खिं आगाम ओव्रचा गेचा यो मदुम्ब" देंशा शुश हिंम हिंम पा हिंच कोइंताक्म।

आंइ रुमी गेय पचा कली जाक्व फेरब, कुशुल नोक्व नु चेम्बपुकी नेल्लेमी यो आंइ गेशो लाम्जी जने मबीसम। मेकोपुकीम "ओदेंशो धर्म पाइब मुरपुकी एको रागीमी बाक्चा मताइनीम। रागी प्रोंइशा गाक्चा माल्नीम" दे यो आंइ कली थाम्पान हिंच कोइंताक्म। गोपुकी नेल्ल थुं का पा आंम थुती थांती पना पन बाक्तक। थमा मसुइक्वपुकीमी आंइ कली मरिम्शो पाम्तेक्म हना यो, गोपुकीमी थाम्पा फाल्शा, मुर नेल्ल आन कली रिम्शो पना पन बाक्तक।

थमा मसुइक्व आन लोव्र

२०४० सालमी सनत के ग्युंवे दुम्त। गाउं डा शुश मुरपुकी "थमा सुइक्व आन ग्युंवे दोदेंशो दुम्बाक्मे" देंशा कोव्रथ जाक्तेक्म। मेको ग्युंवे पपाइक्वा कली काठमान्डु रे पास्टर दिलीप, डोरी नु मन यो जाक्तेक्म। मेको ग्युंवे

कली कोव्रशा गाउं डा मुरपुकीमी "ग्युंवे दा एको कका रिम्शो बाक्त" देंतेक्म। मिनु ग्युंवे नुम नोले सनत ओखलढुंगा उइ लशा बाक्त। मारदे हना आ मीश मेकेर डा अस्पतालमी गेय पाइब

बाक्त। मोपा सनत ओखलढुंगा लम नोले मन्डली डा गेय नेल्ल आं बलामी जाक्त। मिनु गो जोक्थ्री मजोक्थ्री पा सडगती पना पन बाक्ती।

साब्रा गाउं डा मुर आन कली शेंथ लशो

इक्का महिना नोले नबीन जाक्त। मिनु नबीनमी "साब्रा गाउं डा मुर आन कली प्रभु आ पर्वमी शेंथ लय" देंत। मिनु गो, नबीन आ आफ कमल बहादुर नु आ बडो, बिर बहादुर पा चार जना गारशा लाइतक। साब्रा जाक्दीश्शो नाक्दो हुप्ना डा अटक बहादुर आ खिंमी सडगती पाइतक। मेको आ दीसा साब्रा सदगाउंमी दुर्गा बहादुर आ खिंमी सडगती पाइतक। मिनु आ दीसा वाचपु लेक्तक।

वाचपु जाक्शो नोले नबीनमी आं कली "बडो, मुल डा मेरे गेमीन प्रभु भोज यो योक्कीन" दे माइक्ती। मोपा मे डा मेरे आंखां आंखां पा मन्डली डा गेय नेल्ल आं तारी जाक्तीके जोक्थ्री मजोक्थ्री पा नेल्ल पना पन बाक्ती। मेको नेल्ल पचा कली परमप्रभुमी आं कली वारच पाइक्ती।

थमा सुइक्वपुकी ग्याइक्वा पुंइसीशो

इक्का बर्स नोले साब्रा डा वोंइश आल नु वाचपु डा मीश आल के ग्युंवे दुम्त। मेको ग्युंवे पचा कली काठमान्डु रे सामुएल पास्टर पित। मिनु ग्युंवे दुम्शो इक्का नाक्त नोले मुर कामी थमा सुइक्व आन पर्वम रामेछाप डा लल पिया कली चिठी ब्रेक्शा सोइक्ता बाक्त। मेको चिठीमी "साब्रा डा मुरुमी थमा सुइक्व दुम्शा वाचपुमी लशा मेको आन रिती थिती रे ग्युंवे पा ग्युम्ली का चाक्तेक्म। मिनु दल बहादुर आ खिंमी नाक्दो कुस कुस बुक्शा क्यासेट ताप्शा, कुम्सो पा ख्रीस्टेन धर्म पना पन बाक्नीमी" दे ब्रेक्शो बाक्माक्त।

मेको चिठी थिद्मे नोले लल पियापुकी जाक्शा साब्रा डा दुर्गा बहादुर सुनवार, पुर्न बहादुर सुनुवार, दल बहादुर सुनुवार, ग्यन सीड सुनुवार, सिरी माया सुनुवार नु मेको वडा डा ठेयब मुर नर बहदुर सुनुवार कली यो ग्याइशशा रामेछाप लदमे बाक्त। मेको वडा डा ठेयब मुर कली चहिं “आ वडा डा मुर आन कली रिम्शो पा मकोव्रथु, मारदे आन दला दाक्स पा ख्रीस्टेन दुम्चा गोवी” दे हिल्लो पचा कली लदमे बाक्त। मोदे ग्याइशशा लाइक्ची ना हिल्लो हिक्सी पा क्यासेट, कुम्सो किताबपुकी यो थिद्मे बाक्त।

मिनु लल पियामी “एको ते रे चाक्नी? इन कली सुम गोवा” दे हिल्लो पामेनु, मेको थमा सुइक्बपुकीमी “वाच्यु डा केप्टेन मोहन बहादुरमी गेतीकी। आंइ कली थमा सुइक्चा नु ओदेंशो पचा यो मेकोमीन शेंताक्व” देंमा बाक्त। मिनु लल पियामी “इन खोदेंशो पाइब अरु सु सु बाक्नीमी” दे हिल्लो पामेनु, मेकोपुकीमी आं नें, नबीन नु सनत आस नें पा जम्मा १८ जना आन नें चोमे बाक्त।

गो ग्याइक्चा पुंइसीशो

आं कली दोपा ग्यइक्ताक्यीमी देंशा हना २०४३ साल साउन १३ गते डा लोत्र बाक्ब। खिंची डा लल पिया का नु हवल्लदार का आं खिंमी जाक्ताक्स। मेको आस कली “ते गाक्नी” दे हिल्लो पडानु, मेको हवल्लदारमी “इन कली ओखलहुंगामी ब्रेशो बाक्ब। मोपतीके ब्रथ जाक्तस्कु” देंत। मिनु “मारदे” दे हिल्लो पडानु, मेकोमी “उइ जाक्दीशशा तुइक्नीनी” देंत।

मिनु आ दीसा खिं रे गाक्तक। खिं रे गाक्शो आ नित्थ नाक्त ओखलहुंगा जाक्दीत्तक। जाक्दीशशो आ दीसा इनस्पेक्टर

जाक्शा आं कली “गे मोहन बहादुर नवे?” दे हिल्लो पती। मिनु गोम “ओं नड” माइक्ता। मिनु मेकोमी “गेमी रामेछाप लशा मेकेर डा मुर आन कली येसु धर्म डा लोत्र शेंताक्वी दे रिपोट जाक्शो बाक्ब। मिनु मेकेर डा लल पियाम ब्रेशो बाक्ब। मोपतीके गे मेकेर लचा माल्नेवे” देंत। आं कली मोपा ग्याइशशा चाक्शो बाक्ब दे बिशनु नु सनतमी तुइशशा, नाक्दो सनत खमे कुरशा आं कली ग्रुम्थ जाक्त।

आ दीसा सुनी कन लल पिया निक्शी नु रामेछाप गाक्तक। मिनु लल पिया का डोंइती नु का नोले पा लाइक्तीसी। नोले गाक्ब लल पिया इक्का गाक्ने मचापब बाक्त। मिनु “रिम्चा माल्बा कों” देंडानु मेको डोंइती गाक्ब लल पियामी “मुल घोराखोरी चौकी जाक्दीत्तचशो मेकेर जाक्दीशशा, बास बाक्चा माल्ब। मेको आमन आंखां पा जाक्ब” देंत। मिनु घोराखोरी जाक्दीशशो, मेकेर डा हवल्लदारमी “नमस्कार केप्टेन साहेब” देंत। मिनु गोमी “नमस्कार” माइक्ता। मिनु मेकोमी “इन गाउंमी इन कली गेहे पाइब सु बाक्बा?” दे हिल्लो पती। मिनु गो “मारदे?” दे हिल्लो पाता। मेकोमी “इक्का बर्स डोंइती गो ओखलहुंगामी बाक्डानु इन गाउंमी इन पबर्मी लोत्र रुथ सोइक्ताक्यीमी। इन गांउ थिडानु, मोल्खुमी मुर का कली ग्रुम्ता। मिनु मेको कली इन पबर्मी हिल्लो पडानु, मेकोमी “खेती पाती पा बाक्ब। रिम्शो मुर का बाक्ब” देंत। मिनु गोमी मेको कली “मेको मोहन बहादुरमी नें खोइशशा ग्रूशो लाहुरे नेल्ल आन कली पुक्शा, आन बाक्तीक सेल्शा मेको आन कली लडाइ पचा कली शेंना शेंन बाक्ब देंशो नेंशा रुथ जाक्शो नड” मडुनु, मेकोमी “मार मोदेंशो पाइबा डा? मेकोमी दा ब्रिटीस सरकार रे क्येट चाक्शा, आल आन पढेतीक इस्कूल कका सेल्ना सेल्न बाक्ब” दे माइक्ती। मोदेंत हना यो, गो वांच्यु ब्रुप्ती। मेकेर थमान इस्कूल सेल्शो यो ताता।

मेकेर इन गाउं डा प्रधान पन्च कली गुम्ता। मिनु प्रधान पन्च कली इन पर्वमी ब्रेक्शो चिठी कोंइताकड। मेको चिठीमी “मोहन बहादुरमी नें खोइशशा गूशो मुर आन कली खुप्शा सरकार नु लडाइ पचा कली तालीम गेना गेन बाक्ब” दे ब्रेक्शो बाक्त। मेको चिठी कोव्रशा, प्रधान पन्चमी “एको लोव्र पाइब मुर उल्लु बाक्ब। केप्टेन आ खिं मुयु बाक्ब। केप्टेन खिंमीन बाक्म मेइ गो यो लाइनुड, लो लस” देंत। मो देंमेनु गोमी मेको कली “मुल लोव्र नेल्ल रुप्ता। मोपतीके गो मेकेर मलाइनुड। गो एके रेन लेशशा लाइनुड” दे मेकेर रे लेशशा लती” दे माइक्ती।

मिनु गो मेको कली “गो सुइ आन कली मरिम्शो पशो मबाक्नुड। मुल यो आं कली ख्रीस्टेन धर्म पाप्तीवी देंशा, ओंपा ग्याइशशा लाइक्ना लाइक्न बाक्नीमी” दे माइक्ता। मोदेंडानु मेकोमी “गे ओदेंशो रिम्शो मुर दुम्शा, मारदे मदुम्चा डा गेय पवी? नेपालमी अर्को रागी डा धर्म पस मनुइब दे मतुइक्नेवे?” दे हिल्लो पती। मिनु गोमी “गोमी एको धर्म सुइ आन कली श्येत गेचा कली पशो मनड। तन्न आंम कली पशो नड” दे माइक्ता।

मिनु आ दीसा सुनी घोराखोरी डा अर्को लल पिया निक्शी नु रामेछाप गाक्तक। सांघुटारमी जाक्दीशशा, मेको लल पिया निक्शीमी आं कली रामेछाप डा लल पिया आन गुइमी जिम्मा गेतीसी। मोदें आं कली ग्याइशशा सांघुटारमी चाक्शो आं तमी ठूली आ मित्नीमी तुइक्ता बाक्त। मिनु मेकोमी नाक्दो ब्रतीक फेक्तीक नु जचा थोव्रकपुकी चाक्शा गेती। मिनु लल पिया आन कली “एको आं मित्बाबु बाक्ब। एको कली रिम्शो पने” दे माइक्तु। मिनु थमान मेको नाक्दो आं कली गुइमी साडलो यो मफ्रेंदीमी।

मिनु आ दीसा सुनी सांघुटार डा लल पिया निक्शी नु रामेछाप गाक्तक। मिनु पू बजे खोइमी रामेछाप डा लल पिया आन चौकीम जाक्दीत्तक। मेकेर जाक्दीशशोनु, मुर का जाक्शा, आं भोला नेल्ल रोक्शा कोव्रतु।

आं कुरशो भोला आ ग्युरा डा गोजीमी इम्चीली अंग्रेजी बाइबल कुरशो नड। मिनु मेकोमी मेको यो ताप्तु। मिनु मेको गुंडशा एर ओंथ लोक्शा याम का कोव्रशा अरु मार मार नु काथा वोइक्तु। मेको बाइबल चहिं लाइक्चा तडल दे आं थुंमी यावे कली मिम्शा, पुंडना पुंडन बाक्ती। मारदे हना डोंइती नबीनमी “थमा सुइक्ब दुम्शो नु बाइबल का गेना हना यो कुरशा बाक्चा माल्ब” दे आंइ कली शेंशो बाक्त। मेको अंग्रेजी बाइबल पढेस मजोक्ता हना यो, बाइबल डा आं माल्शो पदपुकी ब्रेक्शो बाक्ती।

मेकोम आं भोला नेल्ल कोव्रने थुम्शा “लो दुम्ब लतो” दे मेको लल पियामी नेल्ल लाइक्चा गेती। मिनु गो ग्येरशा डा मीन मेको नेल्ल भोलामी सोक्सु पिक्शा लाइक्ता। मेको इम्चीली बाइबल मुल यो गो नु बाक्ब। मेको बाइबल कली कोइ कोइ ना शोल्शा कोव्रनुड। मिनु डोंइती डा लोव्रपुकी मिम्शा यावे कली ठेयब सेल्लनुड।

मोपा खिं रे गाक्शो ६ नाक्तीमी रामेछाप जाक्दीत्तक। मिश डोन नाक्दो नाक्ती गुइमी साडलो पाइशशा गाक्डानु यो गो काइ मदड। गो नु गाक्ब ठिटा लल पियापुकी दाम्तेक्म। तन्न गो का यो मदड। मोदें परमप्रभुमी आं कली छक लाक्चा डा पा वारच पाइक्ती।

ठिडरो पाइशो



गोपुकी मुर आन कली चोक्शा वोइक्तीकेम (गार्डरुममी) जाक्दीशो। मेकेर दुर्गा बहादुर सुनुवार, सिरि माया सुनुवार नु ग्यान सीड यो बाक्तेक्म। नाक्दो ग्यान सीड नु आं कली ठिडरो पाइक्ताक्मे। मोपा आंइ कली नाक्दो डा ६ बजे रे सुनी डा ६ बजे सम्म खोइलीम ठिडरो पाइशो वोइक्तेक्म। दुर्गा बहादुर रोइ पशो बाक्त। मोपतीके मेको कली नु सिरि माया सुनुवार मीश मुर बाक्तीके मेको निक्शी प्रोक्ने मचाप्नीस दे मेको आस कली चहिं ठिडरो मपाइक्तेम।

सुनी ६ बजे ठिडरो फुइशो लाडगा बाक्चा कली लाइक्तेक्म। मिनु नोले कुल नु गुइ खोइली चिक्थ लाइक्तेक्म। मेकेर आंइ कली खाल पचा कली लल पियापुकी पालो पा बाक्तेक्म। लाडगा बाक्थ नु गुइ खोइली चिक्थ लशोनु यो मेको लल पियापुकीमी आंइ कली का यो मप्रोनेम। लल पिया कोइ चहिं इक्का मरिम्शो बाक्तेक्म। आं कली मरिम्शो यो पाम्तेक्म।

आंइ कली जेल्खानमी लाइक्चा क्येडा डोंइती इक्का नाक्त मेकेर वोइक्तेक्म। मोपा ग्यान सिड नु काथा ठिडरोमी बाक्शो नु मेकोमी आं कली जेल्खान आ पर्वम शुश लोव पाप्तु। कोइल ना “बाजे जेल्खानम लशोनु, इन कली खमे क्येशा गेब गोन बाक्नुड” देंत। कोइल ना “बाजे मेकेर दा नां का यो मतांइसीब ने शां” देंत। कोइल ना “बाजे, गे दा जेल्खान उइ बेक्नीनी केरो में” देंत। कोइल ना “बाजे एको ठिडरोमी खोइली खाइक्पाइक्तु दीसा डा मेरे इक्का थांइशो जुराप लिक्सस हाइ” दे शुश लोव पाप्तु। मोदेशो लोव पना पन नाक्तपुकी का का पा योल्तेक्म।

नाक्तीमी आं कली टोइलेट सफा पपाइक्तीमी। ग्यान सिड कली चहिं मपपदेम। मारदे हना मेको डोंइती परीवार नियोजनमी गेय पाइब बाक्त। मेकेर गेय पवानु, मेको लल पिया नेल्ल आन कली तुइशो बाक्त। मेकेर आंइ कली साता का कली दे वोइक्तेक्म। मिनु साता का गाम्मेनु, लेंशा अर्को साता का तेम्ताक्म।

चोक्तीक रे गुंइचा पुंइसीशो

मोपा साता निक्शी गाप्शो सुनी लल पिया का जाक्शा, आंइ कली “दीसा सुनी ४,२००/- रुपये धरौटी वोइक्तीनी हना, तारीखमी लचा ताइनीनी। मवोइक्तीनी हना, जेल्खानमी लचा मालनीनी” देंत। मेकेर आं तुइशो सुइ यो मबाक्म। आं खां नु क्येट का यो मबा। मोपतीके ग्यान सिड कली “एकेर इन तुइशो मुरपुकी शुश बाक्बाक्तेक्म। आं कली यो क्येट गार पा गेयीनी, है” दे माइक्ता। ग्यान सिडमी “दुम्ब बाजे” देंत। तन्न नोले “बाजे क्येट दा शुश मथिदु। ७,०००/- ला थित्ता। मेको दा का कली ला दुम्ब” देंत।

मिनु गोमी मत्ती ६:२४ मी ब्रेक्शो लोव “मार जचा नु मार तूचा दे गेपुकी सुर्ता मपने” देशो लोव मिम्ताक्ड। मिनु गोमी “मुल मार पचा डा, आंमा सेल्शा मदुम्ब। परमप्रभु आ दाक्शो गाब्ल। गो

मारेइ पने मचापनीकी” दे माइक्ता। गोपुकी प्रार्थना पाइतक। नाकदो यो “प्रभुमी दाक्ताक्व हना, आं कली दीसा सुनी दोपा हना यो, ४,२००/- रुपे क्वेट गार पा गेब दे मिम्शा बाक्ती। मेको नाकदो ग्यान सिङ्मी डोंइती डा खोदेंशो पा मारेइ लोव्सी मपव। मेकोमी यो आ थुं थुंमी प्रार्थना पवा माइ, दे मेको कली गो यो मसेत्तु।

मिनु आ दिसा सुनी दुइ बजेन निन्द्रम प्रोंइती। मिनु “मुल परमप्रभुमी जेल्खानमीन बाक्चा माल्ब देशो बाक्त हना, जेल्खानम लचा माल्नुड। साइ पल्टनमी मिश डा बर्स बाक्डानु, ला यो याम का खोदेंशो लाक्ती। मुल सात बर्स यो महिना का खोदेंशो पा लाइब” दे मिम्ताक्ड। मिनु सुनी ६ बजे लल पिया जाक्शा, आंइ ठिडरो प्रुइक्ताक्म। एर ओथ पा दस बजेसेनु लल पिया निक्शी जाक्ताक्स। गोपुकी यो ठीक ठाक दुम्शा, मेकोपुकी नु गाक्तक। मिनु लाङ्गामी गूशोनु, हारे एर रे ४ जना मुरपुकी पिना पिन पशो ताता। नेक्था जाक्मानु, मेकोपुकी दा आं गाउं डा ब्रिख बहादुर सुनुवार, मन्जु सुनुवार, काठमान्डु डा पास्टर दिलीप खस नु भला काजी कका बाक्तेक्म। मेकोपुकी आं पर्वमी जाक्शो बाक्तेक्म। मेको आन कली तशा, गो थाम्पान ग्येरसाक्यी। प्रेक्कु जुइक्थी दुम्ती। मिनु परमप्रभु कली ग्येरशा थाम्पान ठेयब सेल्ता। मिनु गोपुकी ४ जना नु मेकोपुकी ४ जना नु लल पिया निक्शी पा गो दस जना दुम्शा अदालत लाइतक।

काठमान्डु रे पास्टर दिलीपमी २,५००/- रुपे नु वांच्पु रे ब्रिख बहादुर लोक्बमी १,७००/- रुपे चाक्शो बाक्ताक्स। मिनु मेको निम्फा पा आं कली माल्शो ४,२००/- रुपे जाक्दीत्त। मोपा आंइ कली २०४३ साल भदौ २३ गते तारीखमी जाक्चा दे प्रोंइतेक्म। मेना ३ बजे खोइ दुम्शो बाक्त। साब्रा डा मुरपुकी रामेछाप उइ बाक्तेक्म। तन्न मेकेर आं तुइश्शो सुइ यो मबाक्तीके गो, वांच्पु डा मन्जु, ब्रिख बहादुर लोक्ब, काठमान्डु रे जाक्शो पास्टर दिलीप

नु भला काजी चहिं खिं लेत्तक। मिनु सालुपाटी जाक्शा बास बाक्तक।

मेकेर रे काठमान्डु लतीक नु वांच्पु लतीक लां ब्राक्ब। मोपतीके आ दीसा काठमान्डु रे जाक्ब निक्शी काठमान्डु लतीक लां खोइक्तास। गो नु वांच्पु डा मुरपुकी चहिं वांच्पु गे खोइक्तक। धोबी रे काठमान्डु लचा कली इच्का नेक्था दुम्बाक्त। तन्न मेको निक्शीम मेको लां मतुइश्शो बाक्ताक्स हना यो, हिल्लो पना पन लचा दे मेको लां लाम्ताक्स। परमप्रभुम थमान इं कली गिश शिशी पाइब। मेको निक्शीमी लांमी आं कान्छा तौ प्रदिप कली गुम्से बाक्त। मेकोमी लां तुइश्शो बाक्तीके तेइ मजाम्थु, काठमान्डु सरासर जाक्दीम्मा बाक्त। गोपुकी यो नाक्तीन वांच्पु जाक्दीत्तक।

डोंइती डा तारीख

भदौ २२ गते सुनी कना बोक्शा परमप्रभु कली “मुलाक्ती आं कली वारच पने” दे प्रार्थना पाता। मिनु खमे जशा रामेछाप गाक्ती। मेको नाकदो ढुङ्गेछाप माइक्तीकेमी जाक्दीश्शा बास बाक्ती। आ दीसा सुनी १० बजे रामेछाप जाक्दीश्शा, सरासर अदालतमी लती। मेकेर जाक्दीडानु मेकेर डा ठेयब मुरुमी “अरु ते लाग्मे? मारदे इ काला जाक्डे? नेल्ल गारशा काथा जाक्कीन” दे आं कली हुइश्शा लेशशा सोइक्ताक्यी।

मोपा नेल्ल काथा गारशा काले मिन लचा माल्ब दे डोंइती मतुइक्तु। मिनु मेकेर रे गूशा हुलाक आ आइक्ची हांबुम लशा साब्रा डा मुर आन लां कोव्रना कोव्रन बाक्ती। बल्ल बल्ल तिन बजे गे मेकोपुकी जाक्तेक्म। मिनु नेल्ल गारशा अदालतमी लाइतक। मिनु आंइ कली अर्को महिना डा तारीख गेशा सोइक्ताक्म।

लांमी लेशशा पिना पिन बाक्शोनु, आं कली ओदेंशो मिम्चा पित “अफिसमी दा हुइशशा प्रेशशा पाइबाक्तेक्म। तुइशशो मुर सुइ यो मबाक्नीम। मुल अर्को पालामी मार पाइनीमी माइ” दे हिंचा पित। मोदें मिम्तुनु, परमप्रभुमी “महिनो, मारदे हना गो गे नु बाक्नुड” दे देंशो लोव्र ति फ्रुक्या पित। मिनु आं हिंचा नेल्ल जाम्त। मिनु गो साब्रा डा मुर आन कली “गो नेल्ल काथा जाक्दीचा माल्बाक्त। मोपतीके अर्को पालो छिटो पा जाक्य है” दे माइक्तामी। मिनु ब्राशा आंम आंम लां खोइक्ताक।

अदालतमी वारच पाइब का थिश्शो

खिं जाक्दीशशो इच्का नाक्त नोले “लेती डा भोला दहाल आ मान बारशा रामेछाप अदालतमी जाक्शो बाक्ब” देंशो नेंता। मेको नेंशा थाम्पान ग्येरसाक्ड। गेना तरीख लची नाक्त जाक्बा दे रिम्ना रिम्न बाक्ती। मिनु तारीख लची नाक्त निक्शी बाक्मेनु, गो रामेछाप गाक्ती। मेकेर जाक्दीशशा भोला दहाल कली थित्ता। आं कली तशा मेकोमी “ममइ केप्टेन साहेब ते गाक्नी?” दे हिल्लो पती। “आं कली वारच पने चाप्नीनी कों देंशा, इन कली माल्ना माल्न जाक्ती” दे माइक्ता। मेकोमी “गो आं जोक्शो नु चाप्शो बाक्त हना, इन कली दोपा यो वारच पाइनन्नी” दे माइक्ती।

मिनु गोमी “येसु कली थमा सुइक्तीके आ पबर्म आं कली मुद्दा कोप्शो बाक्ब” देंशो लोव्र नेंनी माइ। मिनु “मुल मार मार पचा माल्बा, मेको आ पबर्म इन कली हिल्लो पथ जाक्ती” दे माइक्ता। मो देंडानु मेकोमी “केप्टेन साहेब गो एकेर जागीर जाइबमी मोदेंशो मारेइ पस मनुइब। वकील कली देंनीन। मेकोमी नेल्ल पशा गेब। तौ दुम्शा जेल नेल्लमी मबिक्तक हना, पाको रुप्व मुर मदुम्सीब दे आंइ किकी पिपी आन लोव्र मतुइक्नीनी?” दे माइक्ती। मिनु मेकोमी अरु अरु लोव्र किरशा लाइक्तु। नाक्दो बास बाक्तीक डा

हुटेल डा मुर आन कली “एकेर रिम्शो वकील सु बाक्बा तुइक्नीनी” दे हिल्लो पाता।

मेको हुटेल आ मालीकमी “कोसी आइक्ची हांबुमी रिम्शो वकील का बाक्ब। मेको एक रामेछापमी जाक्मेनु, आं खिंमीन बाक्ब” देंत। मिनु गो मेको कली “मो हना आफखे आं तारीख गेना दुम्बा, गो इन कली माइक्नन्नी। मेको कली आं कली रिम्चा नड दे मतीन है” दे माइक्ता। मे नोले साब्रा डा मुरपुकी यो जाक्तेक्म। मिनु गो नेल्ल गारशा अदालतमी लशा, तारीख ताक्शा पितक। लेशशा पिशोनु मेको साब्रा डा वारच आन कली “मुल अर्को तारीख कली गो वकील का गारपाइक्ता। मोपतीके मुल जाक्शो तारीखमी पिनीनु, गे नेल्लमी जिया डा ३००/- सहे रुपे पिश्शा पिन” माइक्तामी। मिनु गो नेल्ल आंम खिं गे लेत्तक।

अर्को खेयप डा तारीख जाक्चा नाक्त का डोंइतीन लशा, वकील कली ग्रुम्शा लोव्रसी गारपाइक्ता। नाक्दो बास बाक्तीकेमी शुश मुरपुकी देल्लेक्म। मेको आन दाते डा कामी “बाजे एको दा सरकार बादी मुद्दा बाक्ब। गे दोपा यो मग्रानीनी। मोपतीके गो एको धर्म मपशो बाक्नुड दे माइक्तीनी हना, इन कली प्रॉइशा सोइक्नीम। सरकार कली जोल मपाइब सु बाक्बा डा?” दे माइक्ती। मिनु गोमी मेको कली “यावे आ सोक्तीमी इन कली मेना मार देंचा माल्बा, मेको इन कली शेंब दे बाइबलमी ब्रेक्शो बाक्ब। मोपतीके मेना आं कली परमप्रभुमी शेंब” दे माइक्ता।

मो देंडा नु अर्को मुर कामी “बिदेसी आन डलर जाइबपुकी मार आंइ देंशो बिप्नीमी डा? गिश डलर ताइनेवे” दे हुइक्ताक्यी। मेना आं के महिनामी १३००/- सहे रुपे पेन्सीन बाक्त। मोपतीके गोमी मेको कली “१३००/- सहे रुपे पेन्सन ताइनुड” दे माइक्ता। अर्को कामी “मिश डा क्येट मार पाइनेवे?” देंत। गोमी “मुर

आन कली क्येटमी गेना यो मजाकदीपब” दे माइक्ता। मिनु मेको आन दाते डा कामी “मगाइक्तीन है, बाजे” देंत। मिनु गोमी मेको कली “सुइ नु चुरशा गाइशशा मार तचा डा? गो दा आमं जिया कली रिम्शो दुम्ब दे थमा सुइशशो नड। सुइ मुरपुकी नु जिचा खेचा कली थमा सुइशशो मनड। सुइ नु गाइशशो यो मबाक्नुड। सुमी थमा सुइशशा नु ब्वाक्कुम खुम्शा गुंइचा पुंइसीबा, मेको ब्रोंइचा ताइब नु थमा मसुइक्बपुकी दोस ताइनीम” दे बाइबलमी मोदेंशो देंशो बाक्तीके गो थमा सुइशशो नड। सुइ कली ग्राशा, मारेइ लाइक्चा कली थमा सुइशशो मनड” दे माइक्ता।

मोदें लोव्रसी पा नाकदो १० बजे गे इप्तक। मोदेंशो लोव्र पशो नु वारच का निक्शी चुरतेक्म। तन्न गो चहिं मुर आन कली परमप्रभु आ पर्वम शेंचा ताता दे ग्येरसाक्ड। मिनु “एको रामेछाप डांडामी यो इन लोव्र ब्रल। एकेर डा मुरपुकीमी यो परमप्रभु इन कली तुइक्ने चप्बमेक्ल” दे प्रार्थना पा इप्ती। मिनु आ दीसा सुनी तारीख ताक्शा, आमं आमं खिं लेत्तक।

आंइ वकील हरीसंकर

मोदेंशो पा महिना, महिना रामेछाप लना लन नु पिना पिन पचा डा लाक्शा, मारेइ मदुम। काठमान्डुमी जेठा जवांइमी “हरीसंखर निराउला माइशशो कली वकील वोइक्चा माल्ब। मेकोमी ला ठीक पने चापब” दे देंमाक्त। मोपतीके कान्छा जवांइ सामुएल, पास्टर नबीन नु माइली तमी गारशा, सल्ला पा हरीशसंकर निराउला कली आंइ वकील वोइक्तेक्म, देंशो नेंता। मिनु आं कली पेस्की तारीख ताक्शा, वकील कली खबर पचा देंशो बाक्तीके पेस्की तारीख ताक्शा, काठमान्डु लशा वकील कली देंती। मिनु खिं लेशशा जाक्शा, मुल मेको पेस्की तारीख गेना जाक्बा दे रिम्ना रिम्न बाक्ती।

पेस्की तारीख जाक्चा पांच नाक्त ला लीशो बाक्त। मेको नाक्ती रामेछाप रे भोला दहालमी सोइशशो चिठी का ताता। हतार पा रोक्शा कोव्रडुनु दा रामेछाप डा सरकारी वकील जनकपुरमी लशो बाक्ब। पेस्की तारीख कली इन वकील नु सरकारी वकील निम्फा दुम्चा माल्नीस। मोपतीके एको पेस्की तारीख मुल मदुम्ब” दे ब्रेक्शो बाक्त। मुल मार पचा दे आं पिरसीर ग्युक्ती।

काठमान्डुमी वकील कली पेस्की तारीख एको पाली मदुम्ब दे देंचा कली तुरुन्त लचा माल्ताक्व। तन्न लाइब मुर सुइ यो मदुम्म। मेना मेको पित्थ टेलिफोन यो मबा। आमंन लड हना, पांच नाक्तमी रामेछाप तारीखमी मलथु मदुम्ब। मिनु छिन का मिम्तु नोले आमंन लचा माल्ब खोदेंशो लाक्ती। मिनु आ दीसा सुनी कना बोक्शा, काठमान्डु गाक्ती। किरातेछाप जाक्दीत्वीना थाम्पा ना रिक्त। आं वारच सुइ यो मबाम, आं का ला बाक्तीके इच्का हिंती। “मुल किरातेछाप जाक्दीन्ने मचाप्नुडा कोरा में?” दे मिम्ताक्ड। तन्न प्रार्थना पना पन गाक्ती। मिनु किरातेछाप जाक्दीत्वा कली परमप्रभुमी वारच पतीके नाकदो मेकेर रिम्शो पा जाक्दीशशा, बास बाक्शा आ दीसा काठमान्डु जाक्दीत्ती। मिनु काठमान्डुमी वकील कली गुम्शा आ दीसान लेत्ती।

किरातेछापमी पांच बजे जाक्दीत्ती। मेकेर खमे जशा चैतेघाटमी जाक्दीशशा इप्ती। मिनु आ दीसा तारीख थित्वा कली रामेछाप गे दोरती। रामेछाप पांच बजे खोइ बेला जाक्दीडानु, वारचपुकी आं कली रिम्शा बाक्शो बाक्तेक्म। हतार पा अदालत लशा साधरन तारीख ताक्शा, लेत्तक। मोपा पारमप्रभुमी आं कली गाक्चा कली थाम्पान वारच पती।

अर्को महिना डा तारीखमी लशो नु मेकेर डा मुरुम आंइ कली “मुल जाक्शो तारीख पेस्की तारीख ताक्कीन” देंत। खिं जाक्दीशशा काठमान्डु वकील कली समचार सोइक्ताक्क। मिनु पेस्की तारीख कली रिम्ना रिम्न बाक्तक। पेस्की तारीख जाक्चा नाक्त निक्शी बाक्मेनु कान्छा तौ काठमाण्डु रे जाक्त। मेकोमी “हरिसंकर वकील एको पाली पिने मचाप्व ने मोपतीके पेस्की तारीख अर्को पाली कली याक्चा ने” देंत। मोपतीके आ दीसा सुनी कन रामेछाप लशा भोला दाहाल कली गुम्शा “आंइ के एको पाली पेस्की तारीख बाक्ब। तन्न आंइ वकील एको पाली पिने मचाप्वे। मुल मार पचा?” दे हिल्लो पाता। मिनु मेकोमी दीसा तारीखमी लनीनु, इन दाते डा का मलने। नेल्ल मजाक्नीनु पेस्की तारीख आमन क्यम्सीक्ब” देंत। मिनु गोपुकीमी मेको आ देंशो बुद पा पाइतक। आंइ दाते डा का मलशो। अरु लाइबमी पेस्की तरीख ताक्शो। मे नोले काठमान्डुमी वकील कली खबर पथ लती। पेस्की तारीख जाक्चा डोंइती नाक्तीम वकील हवाजाज रे पिब दुम्त।

पेस्की तरीख जाक्चा डोंइती डा नाक्त गो मन्थली लती। मन्थलीमी बास बाक्तीके मबा मोपतीके इच्का आइक्ची करम्बो माइक्तीकेमी बास बाक्ती। आ दीसा सुनी कना हवाजाज जाक्शा यो जनकपुर लमे बाक्त। गो दा मारेइ मतुइक्तु। मुर निक्शी आं बाक्शो खिंमी जाक्शा “खमे जचा तांइसीबा” दे हिल्लो पाम्ताक्स। मिनु गोमी मेको आस कली “गे ते रे जाक्सी” दे हिल्लो पाडानु, मेको निक्शीमी “काठमान्डु रे” देंताक्स। “काठमान्डु रे हवाजाज जाक्मे डा?” दे हिल्लो पडानु, मेको निक्शीमी “नक जाक्शा यो, जनकपुर लत” देंताक्स। मिनु गो छुल बोक्शा हवाजाज गिरान गे दोरोर पा दोरशा लती। मेकेर जाक्दीडानु, पास्टर नबीन नु मेको वकील

आं कली रिम्शा बाक्शो बाक्ताक्स। आं कली तशा मेको निम्फा ग्येरसाक्स। गो यो थाम्पान ग्येरसाक्ड। मिनु मेकेर रे रामेछाप जाक्दीशशा बाक्तक। मेना रामेछापमी ठेयब मुर जाक्शो बाक्तीके शुश मुरपुकी देल्शो बाक्तेक्म।

आ दीसा सुनी अदालतमी यो शुश मुरपुकी बुक्शो बाक्तेक्म। काठमान्डु रे वकील जाक्शो बाक्ब दे सिनाक्दोन लोव्र ब्रशो बाक्तीके मेको आ लोव्र पशो नेंचा कली शुश मुर जाक्शो बाक्तेक्म। मिनु आंइ वकील नु सरकार के वकील आस दातेमी बहस दुम्त। मिनु बहसमी आंइ वकीलम ग्राशा आंइ कली सफाइ गेम्तेक्म। एको लोव्र २०४४ साल कातीक डा बाक्त।

मेको के महिना निक्शी नोले भोला दहाल छुट्टीमी आ खिं जाक्मे नु आं कली गुम्थ जाक्त। मिनु मेकोमी आं कली “कप्तान साहेब सरकारी वकीलमी इन मुद्दा रामेछाप के अन्चल अदालत जनकपुरमी लेंशा गेशो बाक्ब” देंत। मिनु गोमी “सुब्बा साहेब, मुल मार पचा?” दे हिल्लो पाता। “मारेइ पचा ममाल्नीनी। गे मारेइ सुर्ता मपने। मारदे हना गो यो जनकपुरमी याक्सीशो बाक्नुड। मोपतीके आं कली फुको कागत कामी इन सही पशा गेयीनी। मेकेर लशा गो नेल्ल गारपाइनुड” दे माइक्ती। मिनु गो मेको कली फुको कागत कामी सही पा गेता।

थमान मेको भोला दहाल जनकपुर लशा आं पांडा नेल्ल मेको आंमान पाप्तु। गोपुकी सुइयो मेकेर लचा ममाल्दक। सात मैना नोले २०४५ साल जेठमी भोला लेंशा आं खिं जाक्त। मेना मेकोमी डोंइती रामेछापमी हरीसंकर वकील आ लोव्र कलीन सदर पशा आंइ कली अन्चल अदालत रे यो ग्रापाइशो काघत चाक्तु।

गाउंमी थमा सुइक्ब आन कली रिम्शो पशो

रामेछाप के अन्चल अदालत जनकपुरमी यो मुद्दामी ग्राडु नोले, गाउं डा डोंइती आंइ कली मरिम्शो पाइबपुकी का का पा रिम्शो पचा गोम्तेक्म। आंइ कली “बिदेसी धर्म पाइबपुकी गाउंमी बाक्चा मताइनीम” देंबपुकी आंमान बसइ गाक्तेक्म। “एको आन थिशो ब्वाक्कु मतुचा” देंबपुकीमी आंइ क्येशो खमे जचा गोम्तेक्म। चुरशा गाक्बपुकी रिश्शा लोव्र पचा गोम्तेक्म। नोले गो मार मिम्ताक्ड देंशा हना “गोम मेको मुद्दा मग्राशो नड हना, आं कली आं गाउं रे गुंइशा खेरबाक्मा बाक्त” दे मिम्ताक्ड।

एको मुद्दा गो आंमान ग्राशो मनड। एको नेल्ल परमप्रभु यावे आ पशो बाक्ब। मोपतीके गो गेना हना यो परमप्रभु यावे कली ठेयब सेल्लुड। मेना आं कली शुश मुरुमी प्रार्थना पाम्तेक्म। मेको प्रार्थना पाइब नेल्ल आन कली गो धन्नेबाद देंनुडमी। आं कली मार मार पा वारच पाइब नेल्ल आन कली यो परमप्रभुमी शुश आसीक गेवल।

२०४५ सालम मुद्दा ग्राशो डा मेरे गोपुकीमी संगती पकानु डोंइती डा खोदेंशो पा हिंशा लाप्चो मचोक्क। तन्न लाप्चोपुकी रोक्शा वोइश्शान, खिं खिंमी यावे कली ठेयब सेल्ला कली ग्रुम्शा कुम्सो पांइतक। मेको बर्स डा क्रीसमस थम रिम्शो पा मानेतक। पिपल डांडा डा खेतमी क्रीसमस नाटक कोंइचा कली इच्का लाइश्शो नेल्लेम ततीक ठाउं सेल्लतक। एर ओंथ डा थमा मसुइक्ब आंइ छिमेकी आन कली यो ब्रेशशा शुश मुर दुम्शा ठेयब भोज पाइतक।

परमप्रभु आ लोव्र शेंचा कली काठमान्डु रे सेथ तामाड नु जेम्स गिरी जाक्शा थम रिम्शो पा क्रीसमस कथा शेंताक्स। नेल्ल



खेतमी क्रीसमस भोज जचा कली रिम्शा बाक्शो

बुक्शा क्रीसमस कुम्सो पाइतक। डोंइती गोपुकी हिंशा थरथर पा खिंखिं पांइतक। तन्न मुल दा सुइ सुइ आन कली ब्रेशशा खेतमी नेल्ल अन तचा डा पा परमप्रभु कली ठेयब सेल्लतक।

एको नेल्ल परमप्रभु आ पशो बाक्ब। मे डा मेरे क्रीसमस कली काठमान्डु रे नबीनमी शेंब मुरपुकी सोइक्ताक्मी। पच्छीम नेपालगंज डा पास्टर कर्नलीयस, सुखेत डा पास्टर सोलोमन, कोहलपुर डा पास्टर धन बहादुर आन कली यो आंइ कली क्रीसमसमी शेंथ पालो पा सोइक्ताक्मी। मोदेंशो पा डोन डोन डा शेंब आन रे पा शेंसीचा तकानु, गोपुकी गेना हना यो क्रीसमस जाक्मेनु आलपुकी खोदेंशो पा शुश ग्येरसाक्क।

गोपुकी दा मोपा ग्येरसाक्क तन्न मेको डांडा पहाड गेनायो मगाक्ब पास्टरपुकी दोपा गाक्मा माइ दे मिम्ताक्क। तन्न मेको आन कली मोपा आंइ गाउंमी जाक्मानु, परमप्रभुमी “डांडा मेर यावे आ ग्येरपाइक्ब लोव्र शेंथ जाक्ब आन खोइली गिश



काठमान्डु पिची ना गुम्तीक खिं आ डोइती थमा सुइबपुकी

रिम्शो बाकनीम” दे यसैयामी ५२:७ ब्रेकशो लोव गेना हना यो मिम्ताकड। मिनु मेको लोव ओं पा गाप्शो तांइतक दे परमप्रभु कली ठेयब सेल्लक।

परमप्रभुमी दोपा वारच पाय्यी

“गे जरमेचा डा डोंइतीन इ कली योवतन” दे यावे आ लोवम ब्रेकशो बाकब। थमान परमप्रभुमी आं कली आं ममा आ कोव्रज रेन योव्रयी बाकत। गो जरमेसी डा नु यो नेल्ल क्येडा लाइशो डांडाम जरमेशो बाकती। बरमा डा मिश ठेयब लडाइमी हुम्सीथ लडानु यो, गो मेकेर जाकदीशो इच्का नाक्तीमीन लडाइ नुप्त।

२०१० सालमी बेलायत लडानु, मेडीटरेयन समुन्द्रमी ठेयब फश गिवार पा आंइ डोइशो जहाज हेरारा लोक्साव। मेना यो परमप्रभुमी आं कली बेक्चा रे प्रोंइती। २०१७ साल बरनीओ रे सिङगापुर कुशोनु, आं डोइशो हवाजाज के नाइक्चा कली आ चक्का मग्रूथु, थम मुसकील पा हवाजाज नांइसाक्व। मोपा मेकेर रे यो बेक्चा रे परमप्रभुमी आं कली प्रोंइती।

२०२१ सालमी टेबेडु खोला आ आइक्ची हांबु भेराउ रे दुस्मनमी आंइ कली श्रीइन्च बम आप्बमेनु, हेरारा बेक्तक। तन्न परमप्रभुमी आं कली मेकेर रे यो प्रोंइती। मोदेशो पा परमप्रभुमी आं कली शुश हिंचा डा बेक्तीक रे प्रोंइशो बाकब। मुल रुबुनु, गो आं रे पा परमप्रभुमी आ गेय पपाइक्चा कली मोपा प्रोंइय्यी बाकत।

२०४३-४५ सालमी येसु कली थमा सुइशो आ पर्वम मुद्दा कोप्चा पुंइसाक्यी। मेना आं कली परमप्रभु यावेमी शुश आसीक गेती। बरखा डा हिंच डा भलबाडीमी गिश गाक्चा माल्ताक्यी हना यो, परमप्रभु यावेमी आं कली वारच पशा, गेना हना यो, थुं नाइशो बाक्तीक आसीक गेती। लां गाकडानु, गिश खेयप जचा मताता हना यो, परमप्रभु यावेमी आं कली शोव्रलु मबेक्पाइय्यी। ना नाकदो गाक्चा माल्दा नु हिंचा पातु हना यो आं पचा माल्शो पचा कली मारेइमी मतेक्यी। मुरपुकीमी आं कली “एको दा सरकार बादी मुद्दा बाकब। बाजे गे दोपा यो मग्रानी” देंतेकम। तन्न परमप्रभु यावेमी आं कली मेको मुद्दामी यो ग्रापाइक्ती।

परमप्रभु यावेमी आं कली नेल्ल क्येडा शुश गाक्चा कली सक्ती गेती। मुल गो आंमान मिम्शा आं छक लाक्नुड। पेस्की तारीक याक्चा कली काठमान्डु पिची ना गो आंमान छक लाक्नुड। सुनी चार बजे बोक्शा, गाक्शो नड लिम्ती सांगु दोपा शोक्सी डा। मिनु खिम्ती खोला डा खुइ सांगु नु तांमा कोसी डा चरडगे घाट पा एको सां कोसीपुकी शोक्शो मतुइक्तु। कालेम नाकदो डा नौ बजे किरातेछाप जाकदीशो ला तुइक्ताकड। काठमान्डुमी वकील कली तारीख याक्पाइशो फ्रा लेशशा तारीख थित्त्वा कली आ दीसा रामेछाप जाक्ती। मोपा लांमी दोरशा गाकडा नु तिरखा नु शोव्रलु पशो मतुइक्तु। परमप्रभु यावेमी आं कली गेना हना यो थुं नाइक्पाइशो वोइक्ती। मिनु आं कली कोप्शो मुद्दामी ग्रापाइशो

पंचायती आ ठेयब कानुन कली परमप्रभु यावेमी खतम सेल्लु। में नोले लिखु खोला एर ओंथ डा थमा सुइक्ब आन कली महिंथु, गाक्चा बाक्चा नु परमप्रभु यावे आ गेय पचा कली थुं बारपा आ सक्तिमी प्रिंशा गेप्लु। परमप्रभु यावेमी ओं पान थमा सुइक्ब नेल्ल आन कली ग्रापाइक्ना पाइक्न लदल। आमेन ।

काठमान्डु पीशो

२०५४ सालमी गामनाड डा लल पियापुकी लेती रे पा आं खिंमी जाक्तेक्म। मिनु मेको आन ठेयब मुर असहीमी “कप्तान मोहन बहादुर देशो गे बाक्नीनी?” दे हिल्लो पती। मिनु “ओं गो नड” दे माइक्ता। मिनु मेकोमी “गे नु सटगन माइशो बन्दुक बाक्बा?” दे हिल्लो पती। गोमी “बाक्ब” देंडानु, मेकोमी “गे नु बन्दुक बाक्माक्त। मेको बन्दुक लाइशशा काठमान्डु लने। मारदे हना माओ बादीपुकीमी मंगसीर १ गते रे बन्दुक ते ते बाक्मा, नेल्ल खुप्चा दे सल्ला पशो बाक्नीम।

रामेछाप जिल्ला डा नर बहादुर सुनुवार के यो बन्दुक बाक्माक्त। मिनु मेको रोइशशा लाइक्तेक्म। मेकोपुकी एकेर यो जाक्तेक्म हना, गो इन कली वारच पने मचाप्नीक” देंत। मेना क्रीसमस जाक्चशो बाक्त। मिनु मेको क्रीसमसमी शेंचा कली काठमान्डु रे पास्टर नबीन जाक्त। नबीन जाक्मेनु गामनड डा पुलीस आ लोव्र नेल्ल माइक्ता। मिनु “मुल गो काठमान्डु लचा माल्ती” दे मदुनु, नबीनमी “इन कली मेक लशा रिंशो दुम्ब हना, लने” दे माइक्ती।

क्रीसमस थुम्शो नोले गोमी ग्यान बहादुर सुनुवार कली मन्डली डा मारेइ मारेइ जिम्मा गेता। गो मेना ओखलढुंगा यो लचा माल्शो बाक्ती। मोपतीके २०५४ पुस २७ गते ओखलढुंगा लती। मिनु मेकेर रे पान काठमान्डु लचा डा पा आं मीश नु कुरब मुर निक्शी

लाइशशा गाक्ती। ओखलढुंगा डा पचा माल्शो नेल्ल पने थुम्शा रुम्जटार रे हवाजाजमी काठमान्डु पिती।

काठमान्डु जाक्शो नोले, गो शुश रोइ पाता। रोइमी पतीके गो बोक्शा गाक्ने यो मचाप्ब दुम्ती। मोदेशो तशा आं मीशेमी आं कली “बेक्नुड खोदेशो लाक्डे दे ब्रोइनुड खोदेशो लाक्डे” दे हिल्लो पती। आं कली मेना मारेइ देंचा मपी। इच्का नोले “गो पारमप्रभु आ गेय शुश पचा माल्शो बाक्ब” देशो मिम्चा पित। मिनु गो “माओ बादीपुकीमी मार पाम्तेक्म हना यो, गो वांच्पु लेशशा मन्डलीमी मुर आन कली शेंचा दुम्ती” दे मिम्ताक्ड। मिनु इच्का महिना नोले गो आंखा पा साना सान लती।



आर. एस.एम. आ खिंमी यावे आ लोव्र शेंशो

२०५७ साल फागुन ११ गते डा लोव्र बाक्ब। पास्टर नबीनमी आं कली “बडा आर. एस. एम. बल बहादुर सुनुवार यो मुल दा थमा सुइक्ब दुम्शो बाक्ब। मुल डा मेरे गे मेकेर लशा मेको आन कली हप्तामी काले शेंदीन” दे माइक्ती। मोदेमेनु आं थुंमी “परमप्रभु आ गेय पचा माल्नुड, दे आं मिम्चा कुशो एकोन बाक्मे बाक्त” दे

मिम्चा पित। मिनु गो नबीन कली “दुम्ब गो इन देंशो बुद पा पाइनुड” दे माइक्ता। मिनु बुधबार, बुधबार मेको आन खिंमी लशा मेको आ खिं डा मुर नु मेको आ एर ओंथ डा मुरपुकी नु गारशा सडगंती पाइतक।

मोपा संडगती पना पन बाक्शो चार बर्स दुम्त। मुलद आर. एस. एममी बाइबल कोव्रचा परमप्रभु कली ठेयब सेल्लिके नु पुंइतीक लोव्र नेल्ल पस जोक्ब दुम्त। काबु मेकेर डा संडगती थुम्शा, आं खिं लेत्ची ना आं कली “मुल दा एकेर शेंचा कली कुचा ममाल्नुड। मारदे हना आर. एस. एममी नेल्ल जोक्ब दुम्त” दे मिम्चा पित।

मोदेंशो मिम्ना मिन मेको आ खिं डा भरेड तोंइना तोंइन बाक्डानु, पिया सेशो खोदेंशो दुम्शा ना जिक्क रिक्शा मारेइ मतड। मो दुम्डानु छिन का भरेड ग्याइश्शा दोक राप्शा बाक्ती। मिनु इच्का नोले ठीक पा ताइब दुम्ती। मिनु नोले आंखा आंखा गाक्शा आं खिं जाक्दीत्ती। खिं जाक्दीश्शा, आं कली मार दुम्मे, मेको लोव्र खिं डा मुर आन कली शोव्रतामी। नोले ठुली तमीमी आं कली अस्पतालमी लाइक्ती।

आं लुङगीर जांच पशा डाक्टरमी आं कली “इन पेवा डोन डोन मगाक्कीन। इप्शा बोक्नीनु, जुल बोक्शा मगाक्कीन। छिन का ब्रेक्खे उइ रिम्शा बाक्कीन। मिनु ला गाक्कीन” दे माइक्ती। में नोले गो थमान आर. एस.एम आ खिंमी शेंथ लने मचबु। मिनु गोमी मेको लोव्र जोती कली माइक्ता। जोतीमी “दुम्ब बाजे, गै मचाप्तीनी हना, गो आमन लाइनुड” दे माइक्ती। में नोले जोती आमन आर. एस. एम आ खिंमी शेंथ लत।

२०६२ साल जेठ २८ गतेमी जेठी तमी नु जेठी चैमी गारशा आं कली पुल्चोक डा लुङगीर के असपतालमी लाइक्तीसी। मेकेर डा डाक्टर दिबाकर माइश्शोमी आं कली कोव्रती। मिनु डाक्टरमी

आं कली इन लुङगीर के ग्युरा पट्टी डा नसा इच्का मरीम्शो बाक्ब। मोपतीके इन लुङगीर अपरेसन पचा माल्ब। मोपचा कली १४००००/- रुपये माल्ब। इन खिं डा मुरपुकी नु सल्ला पने” दे माइक्ती। मिनु गोमी “रिम्शो दुम्ब हना, पचा दुम” दे माइक्ता।

मिनु आं कुचु नेल्लेम हल्टर माइश्शो मिसीन केप्शा दीसा जाक्कीन दे सोइक्ताक्यी। आ दीसा लडानु, मेको हल्टर प्रुइश्शा जांच पशा “महिना का एको ओख्ती जशा कोव्रडीन। मिनु महिना का नोले लेंशा जांच पाइनुड। मिनु अपरेसन पचा माल्त हना, मेना पचा” दे महिना का डा ओख्ती गेशा सोइक्ताक्यी।

खिं जाक्शा आं मीश कली “डाक्टरमी अपरेसन पचा माल्ब देंत” दे मदुनु, आं मीशेमी “मुल खुरपो दुम्शा, अपरेसन पस मनुइब” दे देंत। मो देमेनु गो यो अपरेसन पचा मदाक्ड। मिनु जोती नु मीत्र आस कली आं कली लुङगीर अपरेसन पचा माल्ब, दे डाक्टरमी देंशो बाक्ब। गो चहिं अपरेसन पचा मदाक्नुड। मोपतीके आं कली अपरेसन पचा ममाल्दल दे यावे कली पुंइशा गेयीनी” दे माइक्तासी। गो नु आं खिं डा मुर नेल्लेम यावे कली मेको आ पबम पुंइना पुंइन बाक्तक।

महिना का जाक्दीम्मे नोले डाक्टर कोंइथ लाइतक। डाक्टरमी जांच पा “इन कली रिम्शो दुम्शो बाक्ब। मुल कन अपरेसन पचा ममाल्ब। तन्न आंम कली रिम्शो होस पांइसीचा माल्ब। नाक्त किंत किंत इच का का गुइ खोइली नु लुङगीर कली ठीक सेल्चा कली खिं डा कौसीमी एर ओंथ गाक्कीने। श्ये नु जिलील शुश मजने” दे सोइक्ताक्यी। गो परमप्रभु यावे कली थमा पा ठेयब सेल्लुड।

माओ बादीपुकी गारनीमी मिनु खिं लशा, गाउं डा मन्डलीमी परमप्रभु यावे आ गेय पचा माल्ब दे मिम्शा बाक्शा बाक्शा मुलद

खुरपो दुम्ने थुमु बाक्त। मुल दा मिक्च यो रिम्शो पा मताइनुड। मिनु मुल मिम्ताकड “गो आं पचा माल्शो नेल्ल पने थुमु बाक्त” देंती। परमप्रभुमी मुल आं पा डा आं तमी तौ आन कली पपाइश्शो बाक्ब।



२०६४ पौस १० गते

ठुली तमी पाटन चरच नु क्याम्पस क्रुसेडमी, माइली तमी शालोममी, जेठा तौ कनानमी, कान्छा तौ हडकड डा युनीभरसलमी नु कान्छी तमी बेथेलमी परमप्रभु आ गेय पना पन बाक्नीम। मोपा आं तमी तौपुकीमी परमप्रभु आ गेय पशो तशा आं थुं थाम्पा गेरसीशो बाक्ब।

का निक्शी वारचपुकीमी आं कली “मारदे खिं का डा मुरपुकी नेल्ल गुम्तीक खिं कामीन मलाइनीनी?” दे हिल्लो पाइनीमी। तन्न गो चहिं रिम्शो लाक्नुड। गुम्तीक खिं का ला मबाक्थु एर ओंथ डा थमा सुइब आन गुम्तीक खिं आ पर्वम डा लोव्र यो तुइक्चा

तांइसीब। मिनु तेको गुम्तीक खिं डा बाक्तक हना यो, गो नेल्ल आंइ आफ परमप्रभु यावे का आ तमी तौपुकी बाक्नीकी। गो नेल्ल आंइ कली परमप्रभु यावे कामीन सेल्शो बाक्ब। गे मेको गुम्तीक खिं डा नु गो एको

गुम्तीक खिं डा मदेथु नेल्ल गारशा आंइ कली सेल्ब परमप्रभु यावे कली ठेयब सेल्य आमैन।

नेल्ल क्येडा नोले थमा सुइक्ब आन कली लोव्र सां गेनायो मप्रेचा दे, देंचा दाक्नुड।

१. परमप्रभु यावे कली थमा सुइक्ब दुम्शो डा मेरे बाइबल गेना हना यो आंम साथम मप्रॉइचा।
२. गेनायो जोल मपचा।
३. प्रार्थना पचा कली गेनायो मदचा।

